



«Школарду ниттил мазрал луттирдал дузалну буссар»

Ларгсса ножмаркыни «Аьрасат – ттул тарихри» тИсса тарихийсса паркраву Дагъусттаннал кIулшиву дулаврил ва элмул министр ЯхИия Бучаевлул пресс-конференция хьунни. Министринал бувсунни ларгсса шинал хIасилляя ва ялун дуркIсса шинал дуллантИмуння.

5
лаж.



ЧРШ

№ 4
(2318)

5 февраль 2026 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкIссар 1917 ш.
ЦIунил итабакьлан бивкIссар 1991ш.

АхIмад-Хан Султан дуняллия лавгун 55 шин



Совет Союзрал кIийла Виричу (1943 ш., 1945 ш.), СССР-данул слайкь хьусса лётчик-испытатель (1961 ш.), подполковник (1957 ш.), аьралий лётчик, ссаврунал ас АхIмад-Хан Султан 55 шинал хьхьичI, февраль зурул 1-нний ххал дигьлагьисса самолет дагьну, оьрмулуца хьуссар.



3 лаж.

Каспийск шагьрулул 8-мур лицейраву Совет Союзрал кIийла Виричу АхIмад-Хан Султан дуняллия лавгун 55 шин хьанахьисса февраль зурул 2-мур кьини ва дакIнин утлатисса мероприятие хьунни.

Дяьви нанисса ппурттуву ва 603-мийла гьаз хьуссар гьавал-лавун душмантурацал талан, 150-лийла данди увкссар душманнал самолетирттайн. Руртссар 30 душманнал самолёт, 19 самолёт тIурча – гьалмахтурацал уртакьну. Ялар ванал оьрмулул тарих лавхьхьуминнал, «дуртсса самолётру дустуран пишкаш дуву» учинтIиссагу, цIардугу, цIурттигу гьалмахтурангу дикIувча тIисса кьайдалий. Укун чумартсса дакIнил заллу ивкIссар ва.

АхIмад-Хан Султаннул ссукуврай ванал гьалмахчунал, Совет Союзрал Виричу Владимир Ильошиннул: «АхIмад-Хан Султан кIийла Виричу акьар, мукьийла Виричури», – увкуну бивкIссар. (Кьиримнал чи-

чултрал Симферопольлай 2012 шинал итабавкьусса «Амет-Хан Султан – гордость Крыма» тIисса луттирай бувсун бур ва иширая.

«АхIмад-Хан Султан ххишала акъа сивсусса, вас-ццах бакъасса ушивруцIун, дакI хьинсса, цими бусса икIайва. Мюхтажнан кумаг бувайва, цичIар ххира кьадурну. Нагу депортациялуца ххассал бувсара 1946 шинал, Алулкалийсса цала ниттичIан, ттулла буттарссу НасибачIан биян бувну. Дустурал, гьалмахтурал цIа дуларча, ламусравун агьлан икIайва, пахрулул кьанкь дакъасса ия», – тий бур Виричунал ссурахьу Алла Аппазова. Ттул ванишал даIаву дур, оьвчару, чичару, ва буссия АхIмад-Хан

Султаннун ЦIувкIрав гьайкал тIитIлатIисса шадлугьрай, цал уттигу ЦIувкIрав биян хьурдай тий бур. Мудангу барчаллагьрай бур Кьиримнал агьалинашал архIал Виричунал цIа зумату шьав кьадихьлахьисса Дагъусттанналми агьалинаингу.

Машгурсса журналист Бутта Буттаевлул АхIмад-Хан Султаннул оьрмулиясса лу гьашину цIуница итабакьинтIишиву бувсунни чичул наслулиясса Александрал.

АхIмад-Хан Султан – чувшиврул, сисаврил ва Ватандалухсса куртIсса ччаврил эьратри, ва бюхттулсса хасиятрал лишанни, гьар чIуннардий ва гьарца халкьунначIа хIурматрай диркIссар ва дикIантIиссар.

Патимат РАМАЗАНОВА

Иван Ярыгиннул 37-мур Кубокрай

Вай гьантрай Красноярский кьуртал хьунни лачIун буккаврил дуняллул халкьуннал дянивсса Иван Ярыгиннул Кубокрал турнир.

2026 шинал хьусса турнирданий гьуртту хьуну бур уттинин хьусса шиннардийнир чIавусса лачIунбуккулт – 486. Ми бивкIун бивкIссар 21 билаятрая: Азирбижаннава, Беларусьнава, Болгариянава, Бразилиянава, Грециянава, Гуржистанная, Египетнава, Индиянава, Китайнава, Кубанава, Кьзахьистанная, КНДР-нава, Кореянава, Кьиргьистанная, Мангьулнава, Аьрасатнава, Ухссавнил Македониянава, Таджи-

кистанная, Туркменистанная, Турциянава ва Узбакистанная.

Арамтурал турнирданий лачIун увккун ур 322 инсан 19 билаятраясса. Арамтурал дянив яла машгурмур диркIун дур 74 килорал кIушиврулсса, ваний гьуртту хьуну ур 10 билаятраясса 40 спортсмен. КьатIаллил билаятиртая яла чIавуми лачIунбуккулт бивкIссар Мангьулнал командалу – 51 спортсмен. Ва командалу ва Аьрасатналссаннул кка-

ккан бувну бия цала спортсментал 10 чурххал кIушиврий.

Дагъусттаннал лачIунбуккултрал дурххуну дур 20 медаль: 6 мусил, 6 арцул ва 8 чарвитул. Жула командалул бувгьуну бур цалчинмур кIану.

Мусил медальду дурххуну дур Башир МахIаммадовлул, АхIмад Усмановлул, Ибрагьим Кьадиевлул, Аманулла ХIажимахIаммадовлул, МухIаммад-Пагьир Ханиевлул ва Шамил Мусаевлул. Жула лаккучу Ибрагьим Ибрагьимовгу лайкь хьуну ур арцул медальданун.

ХI.АБДИЛОВ



Халкъуннал Мажлисрал 51-мур сессиялий

Январьданул 29-ний Дагъусттаннал парламентарал спикер Заур Аскандаровлул каялувшиврий хъунни Халкъуннал Мажлисрал 51-мур сессия.

Ваний гуртту хъунни Дагъусттан Республикалул бакIчи Сергей Меликов. Сессиялий гуртту хъунни мукума ДР-лул ХIукуматрал члентал, исполнительный властьрал органнал каялувчитал, ДР-лул бакIчинал Халкъуннал Мажлисравусса вакил Нюсрет Омаров, СВО-лул Аьрасатнал Чалчинма Виричу НурмаIаммад ХIажимаIаммадовлул нину Сапигат Мазаева, властьрал федерал органнал вакилтал, «Доблесть гор» кадрардал программалул гурттучитал, жяматрал чулухасса вакилтал.

БавтIминнал хъьичI махъ лавхъунни Сергей Меликовлул. Ванал тIмунийну, биляятрал президент Владимир Путиннул баян бувсса Аьрасатнал Халкъуннал цашиврул шинал личIинурасса мягна дуссар жула республикалул, Аьрасатнал чIявумиллатру бусса регион хIисаврай. «Жула шала биляятран Халкъуннал цашиврул шин – хъанахъиссар виваллил ва кватIаллил вызовиртгайнсса уттигу ца жаваб», – увкунни региондалул бакIчинал.

Сергей Меликовлул баян бунни Дагъусттаннай дайдихлахъишиву Аьрасатнал Халкъуннал цашиврул шин.

«Лишаннусса иш хъанахъиссар Буттал кIану буруччул шин Аьрасатнал Халкъуннал цашиврул шинийн дуккаву, жямат цачIун баврил пикрицикриндугу хъьичIунмай бачин булла. Жува куннал яруннавун кув вихшалдарай буруглагиссаксса, жува цинявннай



ххувсару», – увкунни махъ лахлахъиманал.

Дагъусттаннал бакIчинал бувсунни миллатиртгал цашиву яла гужмур ярагъ хъанахъишиву.

«ЩищачIав къашайссар жуьрва ххув хун, жува цачIу буссаксса. Оьруснал аьралийчунал бусурманчунал чаклил къаралданий уссаксса, ххачпараснал кашиш ва бусурманнал имам жула саллатIнаха чак булла, алхIам ккалай буссаксса, жува куннал кув яруннавун вихшалдарай ва хIурматрай буруглай буссаксса жува ххувсару», – увкунни республикалул бакIчинал.

– Жува хIакъину цIунилу исват буллай буру жула къанкъашиву, жуйнна дуллалисса вызовиртгал хъьичI цакъну бацIан бюхъаву. Ккаккан дуллай буру жула къанкъашивугу, цакъгу СВО-лул зоналийсса жула аьралийтурал ктуццулийну. Тикку бартлагантIиссар ци-

няв жула мурадру. Жува циняв пахрулий буру жула вирттарая, цачIу кабакълай буру жула аьралийтурацIун, цIусса регионнал ялапарлувтурацIун мукъуйнугу, иширайнугу», – увкунни Сергей Меликовлул.

Аьрасатнал Халкъуннал цашиврул шинал лагрулий Дагъусттаннал бакIчинал бивхъусса задачартту бартбигъавриву депутаттурал бугълагъисса кIанттул хIакъираву Заур Аскандаровлул укун увкунни:

«Депутаттурал личIинувасса кIану бугълагъиссар. Жуватува гьарцама цIакъ увну ур пала райондалуцIун, шагьрулуцIун. Гьаманки, кIантту-кIанттурдай, инсантурашал дахIаву дуллай ялун личайссар бунияласса цашиву. Жура дуллалисса давуртайну, масъалартту бартбигъаврийну кумаг хъанан аьркинссар бунияласса захIматшивуртту духлаган дуван, мунийну цIакъ дуллан республикалул яла-

парлувтурал дянивсса вихшала ва куннан кув бувчIаву. Депутаттурайн тапшур буллай ура чялишну гуртту хъун дуллалисса мероприятиярттавух».

Сессиялий махъру лав-

хъунни мукума ДР-лул Халкъуннал Мажлисрал председателънал хъиривчу Камил Давдиевлул, Дагъусттаннал бакIчинал Иасса Хъунисриннал советрал председателъ Ибрагъим Ибрагъимовлул, «Время Героев» программалул гурттучи МахIаммад Валиховлул.

Яла цаппара депутаттуран дуллуни наградартту.

Сергей Меликовлул ДР-лул парламентарал депутат Имам Яралиевлул дуллуни «За милосердие и благодеяние» тIисса Дагъусттан Республикалул ХIурматрал лишан.

Муния махъ депутаттурал ххал бивгъунни «Дакъаврил судиятал битаврил хIакъираву» тIисса масъала. ДР-лул Верховный Судрал председателъ Федор Щукиннул бувсунни цIуну битан хIадур бувминнал цIарду. ЦIуну къуллугъирттай бивтсса «дакъаврил судиятурал» хъа бунни лажин кIялану зун.

Депутаттурал къамул дунни цаппара законнал проектру.

Дагъусттан Республикалул бакIчинал ХIукуму

ЦIуссалакрал райондалул лак цIусса миналийн бизан баврил ва Аухуллал район утгара дуккан даврил масъаларттан хасъсса Дагъусттан Республикалул ХIукуматрал управлениялул чIумуйсса хъунаману итаврил хIакъираву.

ЦIуссалакрал райондалул лак цIусса миналийн бизан баврил ва Аухуллал район утгара дуккан даврил масъаларттан хасъсса Дагъусттан Республикалул ХIукуматрал управлениялул хъунаману чIумуйсса итан ХIасанов Аьлибаг Муслимлул арс.

Дагъусттан Республикалул бакIчи **С.МЕЛИКОВ**

ш.МахIачкъала, 2026 шинал январьданул 16-ний, № 6.

Баян бунни барчаллагъ

Элмулул ва педагогикалул давурттаву лавайсса даражалул пишакартал хIадур бавриву лайкъ шаврихлу ва чIярусса шиннардий лажин кIялану дурсса давурттахлу «Дагестанский кадровый центр» тIисса Дагъусттан Республикалул паччахIлугърал пишакаршиврул дуккаврил идаралул каялувчи ТахIманов Мусалан МухIуттиннул арснал баян бунни АьФ-лул Президентнал чулухасса барчаллагъ. Мусаланчул ттинин хIалал дурсса наградарттавух дур укунссагу:

ТахIманов Мусалан МухIуттиннул арс увну ур 1960 шинал сентябрьданул 12-ний.

1977 шинал хъьичIунну къуртал бувну бур Буйнакскаллал 9-мур дянивмур даражалул школа, гара шинал дулкан увххун ур Дагъусттаннал паччахIлугърал университетрал экономикалул факультетрайн, 1982 шинал къуртал бувну бур «Планирование промышленности» тIисса сянат язи дургъуну.

1983 шинал сентябрьдануйннин зий ивкIун ур Дагъусттаннал янна дуруххайсса фабрикалий захIматрал инженеру (инженер по труду).

1990 шинал мартрайннин – ДАССР-данул Госпландалул экономистну, хъунама экономистну, главный экономистну.

1991 шинал декабрьдануйннин – ДАССР-данул Министртурал советрал Экономикалул реформалул хасъсса комитетрал территорияртгал самоуправлениелул отделданул хъунаману.

1995 шинал октябрьдануйннин – ДАССР-данул Министртурал советрал Рынокрал арарду лядуккан даврил центрданул директорнал хъиривчуну.

1998 шинал июльдануйннин – АьФ-лул ПрезидентначIасса паччахIлугърал къуллугърал Аьрасатнал академиялул аспирантну.

1999 шинал августрайннин – Дагъусттаннал паччахIлугърал халкъуннал хозяйствалул институтрал менеджментрал кафедралул хъунама преподавательну.

2000 шинал майраннийн – «Топ-аудит» ООО фирмалул вакилханалул (представительствалул) директорну.

2004 шинал февральдануйннин – ДР-лул ХIукуматрал председателънал советникну, ДР-лул ХIукуматрал председателънал секретариатрал каялувчуну.



Мусалан ТахIманов

2008 шинал мартрайннин – ДР-лул экономикалул министрнал хъиривчуну.

2008 шинал декабрьдануйннин – ДР-лул Халкъуннал Собраниялул Аппаратрал каялув-

чинал хъиривчуну.

2013 шинал ноябрьдануйннин – ДР-лул Президентнал ва ХIукуматрал Администрациялул каялувчинал хъиривчуну, цалчинма хъиривчуну.

2015 шинал апрельдануйннин – ДР-лул БакIчинал ва ХIукуматрал Администрациялул каялувчинал хъиривчуну.

2017 шинал февральдануйннин – ДР-лул захIматрал ва социал лябуккулул министрнал цалчинма хъиривчуну.

2021 шинал февральдануйннин – ДР-лул БакIчинал ва ХIукуматрал Администрациялул сакиншиндарал ва проектидал управлениялул хъунаманал хъиривчуну.

2022 шинал октябрьдануйннин – АьФ-лул ФС-лул Госдумалул депутат Д.Н. ХIасановлул кумагчуну.

2023 шинайннин «Дагестанский кадровый центр» ГБУ-лул каялувчинал хъиривчуну.

Ванан дуллуссар укунсса наградартту: «Дагъусттан Республикалул лайкъ хъусса экономист» тIисса хIурматрал цIа, ДР-лул ХIукуматрал ХIурматрал грамота, Агъали давуртгал дузал баврил ПаччахIлугърал къуллугърал лишан, ДР-лул Президентнал цIа чирчусса ссят, АьФ-лул Центризбиркомрал Барчаллагърал чагъар.

ХIадур бувссар ХI. АьДИЛОВЛУЛ

Ккулал райондалия

Кьянкъашиврул ва чувшиврул лишан

Тарихраву агьамсса кІану бугьгусса Ленинград шагьрулул блокадалул ахир хьуния шиннай 82 шин шаврин хас дурсса кьинилуцІун дархІусса мероприятие хьунни Ккулал райондалийсса Ваччийл шяравусса Культуралул ва досуграл центраний.

Шикку гьуртту хьунни дуклаки оьрчІру ва Ваччийл шяраваллил жямат. Центрданул зузалтрал хІадур дурну дия «Блокадалул ччатІ» тІисса цІанилусса, Буттал кІанттул цІанийсса Хьунмасса дьэвилул яла кьучагьмур ва захІматмур лажин хьамакаритаву мурадрайсса мероприятие.

Ваний гьурттухьуцириннан буллуна «Блокадалул ччатІ». Блокадалул чІумал 125 грамм дусса ччатІ булайсса бивкІссар ца бакІран. Ва чІивисса ччатІул парча хьанахьиссар, тай захІматсса чІунну дурхІусса ин-

сантурал кьянкъашиврул ва чувшиврул лишану.

Ленинградулал блокадали-ясса дакІнин бичавурттая, вайннан квавкмуния бувсуна Центрданул художествалул каялувчи Асият МахІаммадовал.

–1941 шинал сентябрь зурул 8-нний дайдирухьуссар Ленинградулал блокада. Гитлердул чапхунчитурал хьунисса хяллу бивкІссар шанма-мукьва зурул мутталай шалла жула хІукумат кІунттихьхун ласунса. Ккашил ва дякьил кьатІ буну най бивкІссар шаллусса кулпатру. Гьантлун ца бакІран ккаккан дурну диркІссар 125 грамм ччатІул, мугу ниттихьал цалва кьабувкуну, оьрчІан булайсса бивкІссар. 900 гьантлий Ленинградулал агьлу бивкІссар душманнал шалклул лагма рургьун, цукунчІавсса дуки-хІачІия ласун кьахьанай азурда хьуну. ЛичІи-личІисса хІисаврттайн

буну, блокадалул ппурттуву оьрмурдацІа хьуну бур 600 азарунния 1,5 миллиондалийн бивсса инсантал, вайннава чІявумигу ккашил ливтІусса бур.

Жула халкьуннал чувшиву ялтту дурккуну, виричуну дурхІуссар тай яла захІматми чІунну. Шинну циксса гьарчангу, тачІагь хьамакаритантІиссар жунна Буттал кІанттул цІанийсса Хьунмасса дьэвилул ца яла захІматми чІунну. Кьабювхьуссар душманнаша ник ришун бан жула чиваркІ, – увкуна ванил.

Ленинградулал агьалинал лархьусса захІматсса кьинирдая бувсуна Хьун дьэвилул ветераннал кулпат Нурижат Муслимовал ва захІматрал ветеран ПатІима Гуйдалаевал.

Дуклаки оьрчІру личІулну вичІи дирхьуну бия блокадалул тарихрая бусласисса ихтилатиртгах.

Имара САИДОВА

Гьарца шинах январьданул 27-нний Аьрасатнаву шай «Блокадный хлеб» цІанилусса акция. Ванивух, муданна кунна, гьуртту хьунни лакрал шархьурдугу, дакІнин дуртунни Буттал кІанттул цІанийсса Хьунмасса дьэвилул ца яргьмур, цІанихмур лажинну хьанахьисса Ленинградулал блокада.

Ленинград фашистьтурал блокадалуша тархьан буну 82 шин шаврин хасну Гьумучиял дянивмур даражалул школалай хьунни «Непокоренный Ленинград» тІисса батІаву.

– Жун аьркинну бия оьрчІан ккаккан буван, захІматшивуртту духІан багьсса чІумал, инсантураву гуж цуксса ххишала шайсарив, цукун цачІун шайсарив, – тІий бур школалул директор Соня Макьаева.

ШавкІрав «Блокадалул ччатІ» тІисса акция хІадур дурну дия ЦТКНР-лул ва библиотекалаул зузалтрал. Вайннал дуллалисса давривух гьуртту хьунни шяраваллил школалул дуклаки оьрчІругу.

Щаравгу, библиотека ва школа цачІуну, хьунни мукуннасса акция. Школалай дунни «Непокоренный Ленинград» ва «Блокадный хлеб» – символ жизни и надеж-

Лакрал райондалия

Блокадалул ччатІ



ды» тІисса классрал сьятру. Шикку оьрчІахь бувсунни тай гьантрай Ленинград шагьрулийсса инсантурал дурхІуцири аьзав-аькьуварттая.

Вара журалийсса батІавуртту хьунни райондалул цайми шархьавугу.

Бадрижамал АБЛИЕВА

ЦІуссалакрал райондалия

Аьралийтурансса кьертту щащаврил

дарсру

ЦІуссалакрал райондалийсса Чапаевкалал 2-мур школалай технологиялул дарсирдай дуклаки оьрчІру бур аьралийтурал мюхчаншиву дурччавриву ишла дайсса кьертту шашлай.

Школалай укунсса давуртту дайдишаврийну, дуклаки оьрчІру захІмат ххирану, патриотьгалну тарбия баву бакьассагу, Ватандалул мюхчаншиву дурччавривух хьанахьиссар. Директорнал кумагчи Загьидат Рамазановал ва хьунмур вожатая Огурхановал дуклаки оьрчІан лахьхьин бунни маскировкалул



кьертту шашлан.

Укунсса дарсирдалли оьрчІавун аьралийтурал чІарав бацІлан ва кумаг буллансса гьира-шавкь рутайсса.

ХІакьинусса кьини дуклаки оьрчІал бувсса захІмат аьралийтуран хьунмасса хайр-мюнпатну бацІлацІиссар.

Имара САИДОВА

Райондалул администрациялул бакІчи Зураб Куччаевлул каялувшиндаралу хьунни шяраваллаву спорт хьхьичІуннай даврин хас дурсса батІаву. Ваний гьуртту хьунни райондалул бакІчинал хьиривчу Малик ХІусманов, Гьумучиял ОьрчІал ва чІава жагьилтурал спортшколалул тренертал, физкультуралул дарсру дихьла-хьисса учительтал.

Спорт – бучІантІимунийнсса инвестицияр

Яла агьамсса масьала бия Гьумучиял ОьрчІал ва чІава жагьилтурал спортшколалай тренировкерттал шартІирдайн багьайсса.

Ххал бивгьунни спортшкола цІу буккан баврийн, материал-техническая база цІакь баврийн, спортрал инвентарь дузал даврийн ва чІава спортсментуран мюхчансса ва лябуккусса шартІру дузал даврийн багьайсса масьалартту. Хаснура кьулагьас дурунни шяраваллаву спортрал оьрму чантІ учин баврих.

«Спорт хьхьичІуннай даву,

хаснура оьрчІалсса – жула райондалул бучІантІимунил ххуллийсса инвестицияр. Жура аьркинссар хІасул дан райцентрданий ялапар хьанахьиссаннангу, архьсса шяраваллаву ялапар хьанахьиссаннангу цасса шартІру», – увкунни райондалул бакІчинал.

БатІаврил хІасиллайн буну жавабулусса инсантурайн тапшур бунни хІадур бан спортшколалул материал-техникалул база цІакь бансса маслихІатру. Ванил ялув ацІан тапшур бунни Малик ХІусмановлуин.

Зулайхат ТАХАКЬАЕВА

АхІмад-Хан дакІнин увтунни АхІмад-Ханнул цІанийсса лицейраву

Каспийск шагьрулул 8-мур лицейраву Совет Союзрал кІийла Виричу АхІмад-Хан Султан дуниялия лавгун 55 шин хьанахьисса февраль зурул 2-мур кьини, ва дакІнин углатисса мероприятие хьунни.

Ва лицей цуппагу Виричунал цІанийссар, укунсса мероприятиерттугу чя-чяни дувайсар бусравсса инсантурайн ва ЦІувкІулал шяраваллил вакилтурайну оьвкуну.

Лицейравун бавтІун бия хьхьирил авиациялул ветерантал, СВО-лий ливтІусса чиваркІуннал мачча-гьанми.

ТІутІив дирхьунни школалул хІаягравусса Виричунал гьайкалдануцІ, дуклаки оьрчІал дурккунни Виричунан хас дурсса назмурду. Аьдатрайн буну, кьамул бунни «Аметхановцы» кьюкьравун чІава патриотьтал.

Авиациялул Ветерантурал советрал сипталайну Каспий-

ская флотилиялул вакилтурашалсса хьунабакьавугу дунни вара кьини лицейраву. Хьамаллуравух бия «Дагьусттаннал авиатортал» проектрал хьунама, кІицІ лавгсса лицейрал выпускник Валиев МахІаммад, летчик Корпенко Александр, майор, эскадрильялул штабрал хьунама Серкилов ХІажи, аьралий хьхьирил флотрал ветеран Ажув Шяпиуллагь ва цаймигу бусравсса инсантал. Хьамаллурал бувсунни АхІмад-Хан Султаннул гьунардая. Ванал цалва оьрмулуву кьабивтссас асардал биялалая.

Бусанна вара кьини Москвалив Виричу увчусса Новодевичье хІаттали ванаг гьаттацІ ТІутІив дишин бившиву Цалчинмур ЦІувкІулал диаспоралул вакилталгу, укуннасса мероприятие хьушиву Цалчинмур ЦІувкІулал школалайгу.

ПатІимат РАМАЗАНОВА

ХІурмат бусса буккулт!

Кумаг бара лякьин МахІаммадхан Сайпуллаев тІисса инсан. Ва увну ур 1963 шинал Каспийск шагьрулий. Шиккува школагу кьуртал буну, 1980 шинал дуклан увххуну ур Иваново шагьрулий ИВГУ-лул химиялул ва биологиялул факультетрайн. Ва лаккучу усса ур, цумур шяравассарив кІулу бакьар.

МахІаммадханнах луглай ур Виталий Цай (кореец), вай кІиягу ца факультетрай дуклай бивкІун бур.

Тавакьюри, МахІаммадхан Сайпуллаев кІулсса ухьурчан «Илчи» кказитрал редакциялийн баян баву ягу ва телефондалул номерданий оьрчаву: 8-988-213-14-64.

Баян

Утерянный аттестат Б. № 50 67 72 11 о среднем общем образовании на имя Рамазанова Бадрутина Хизруллаевича, выданный Шаринской СОШ Лакского района 22. 06. 2006 г. считать недействительным.

Лакрал райондалия

Хьунаавкьунни щархъал агъалинащал

Буршай

Райондалул бакIчи Зураб Куччаев ивунни Буршиял шяравун.

Ванащал бия райондалул бакIчинал хьиривчу Малик Хиусманов, кумагчи АхIмад Будайчиев, Депутатътурал Мажлисрал хьунама Явсуни Хиамзаев, идарарттал каялвчитал.

Шяраваллил бакIчи Амсар МахIачевлул, шяравух экскурсия буллаи бунува, делегациялун ккаккан дунни дузрайн дурксса проектру, бивсунни хьхьичI бивхьусса мурадирттая. Миннува ца яла агъамсса кIанттай ккаккунни шяравун интернет дуцаву ва мобил связьрал вышкарду дишаву.

Шяраву бан дакIний бусса бур ттизаманнул тIалавшиннардацун бавкьусса спорткомплекс, шяраваллил инфраструктура хьхьичIуннай давил ва жагьилтурал оьннасса чIун дуцин дансса чаранну Хиисаврай.



ФАП-раин бивну, ххал дурунни дузалшиндарал ва агъалинал медициналул кумаг баврил шартIру,

КIицI лавгунни чIарусса сиптарду ва проектру чулийн дукалай душиву шиччасса Ислам МахIачевлул кабакъулийну.

Чиримур ватан хьхьичIуннай давил ххулий ванал бихъла хьисса захIмат лавайсса кьиматрай КIицI лавгунни шяраваллил ва райондалул вакилтурал.

«Архсса ва лахьсса зунттал кIанттайсса шяраваллу хьхьичIуннай даву – шиккусса оьрмулул, давил ва дунияллушассе дахIаврил шартIру дузал даву райондалул хьхьичIунсса ххуттай буссар. Ххари хьунсса иш бур вай мурадру чулийн букканшиврул властьрал ва чялишсса шяравучутурал хIарачатру цацIун буллаи бушиву», – увкунни Зураб Куччаевлул аьрххилия махъ.

КIамахъалив

Зураб Куччаев делегациялушчал ивунни чIаххуврайсса КIамахъаллал шяравун. Ххал бунни мизит, зилув, увккунни шяравух.

Кинттул чIумал шяраву инсан ацIлай акъар, гьинттул бигъалаглан нажагь букIларчагу.

«Шяраву рухI дакъахьурчагу, асар хъанай дия «заманалуву микIларчIсса» суратру. КIичIирттаву нанийни, асар хъанай бия нукIузаманнул ахI. Ядурну дур буттахъал лашин –

хIужрарду, тIаннул дарвазартту, дарвазарттал ялув Кьуръандалува аятирттал накьич дирхъу чартту. ЯбатIин къашайсса дур цIувцIучарил архитектура, эмаратсса тIабиаьт. ЦIанакулва кIункIу бан бюхъантIий бур шиккун тарих, тIабиаьт ва аьдатру кул дан чIисса туристътал», – увкунни, шяравух увккун махъ Зураб Куччаевлул.

Шяраваллил бакIчи Расул ЦIаххаевлушчал хIукму бунни ххал бигьин КIамахъаллал шяраву этнографический ва экологический туризм хьхьичIуннай дансса ххуллурду.



Урив

Райондалул бакIчи Зураб Куччаев ивунни Уривгу. Ванащал бия райондалул бакIчинал хьиривчу Малик Хиусманов, азарханалул хьунама хIакин АьбдурахIин Дибиров, энергосетирдал ва ххуллурдал кьулдугьрал пишкартал.

Шяраваллил активрашалсса хьунабакъаврий сукку бунни вай масъалартту: хIачIайсса шин диял хъанай дакъашиву, бух хьусса щинаххулу баххана бан багълай бушиву, машинартту лагайсса ламу лекъавайсса тагъарданий бушиву. Хаснура кьулагъас дурунни инсантал ялапар хъанахьисса къатраин лахIуни дуккан бюхъайсса нигъачIаврил ялув.

Муния махъ, ххал бивгьунни агъалинал къатран нигъачIаву дусса кIану, вичIидирхьунни къатрал заллухъруннах.

«Тагъар хIисав дурну, анавархьиндарай чаран лякьин багълай бур. Инсантурал мюхчаншиву хьхьичIххуйттай дикIан аьркинссар», – увкунни Зураб Куччаевлул. Тапшур бунни чьясса мутталий инсантал нигъачIаву дусса къатрава чIумуйнусса цайми къатравун бизан буван. Масъала райондалул бакIчинал цала кьулагъасрайн лавсунни.



Хьирив Куччаев ивунни фельдшертурал пунктрайн. Ихтилат бунни цIулул-сагъшиву дуручаврил зузалтрашал, ххал диргьунни захIматрал шартIру, дарурттал дузалшин. Мичча ивунни школалийн. Ялтту увкунни классирттал, гьалгъа бунни педагогтурал, ххал диргьунни дуккавил шартIру, колллектив ябаву мурадрай, ххисса оьрчIру кIункIу бансса чаранну.

Хасьсса кьулагъас дурунни шяраваллил тарих ябулаллисса школалул музейрах. КIицI лавгунни хьирив нанисса ник тарбия давил ххулий магьирлулгь-

рал ирс ябаврил агъамшиву. «Школа, музей, библиотека – вай шанма агъамсса идаралул бияла хьунмассар цумурбухъурчагу кIанттул ялун бучIантIимур цIакъ баврил цIаний. ОьрчIал кIулшиврул даража лахьсса бикIан аьркинссар, райцентрданий дуклакиминналгу, архсса шяраваллаву дуклакиминналгу личIишиву дакъа», – увкунни Зураб Куччаевлул.

Уриннал жяматрал сукку бивсса масъалартту райондалул бакIчинал цала кьулагъасрайн лавсунни, махъ буллунни гьарца суалданун чаран лякьин.

Зулайхат ТАХАКЪАЕВА

Январьданул 27-ний, Ленинград шагьру блокадалува буккан бивсса кьинилун хасну Гьумук хьунни акция «Блокадный хлеб».

Вихшалдарал аьшну хьусса ччатIул касак



Мероприятие сакин дурну дия сайки 900 гьантлул мутталий душманнал вив лавсун бивкIсса, дяркъу, ккаши ва мякъ бивхIуну душман шагьрулулун уххан къавитсса Ленинград шагьрулул агъалинал виричувиврия, къанкъашиврия, Ватандалухсса ччаврия ялун нанисса никирахъ бусансса мурадрай.

КIира ва дачIи шинай лахъи лавгсса блокадалул захIматсса шартIирдава лахIан бан къавхьуну бивкIсса, цал виричувиву ва чумартшиву шала дунияллул эбратну хьусса Ленинградлул агъалинал аьпалул хIурмат КIицI лаган бивкIун бия райондалул администрациялул ва идарарттал зузалт, дуклаки оьрчIру.

Акциялул лишанну хьуну бия шагьру вив лавсун бивкIсса чIумул мутталий кьинилун булун ккаккан бивну бивкIсса,

125 грамм лахIлахIисса ччатIул касак.

Райондалул администрациялул бакIчинал хьиривчу Малик Хиусмановлул КIицI лавгунни лахъисса чIумул мутталий блокадалул захIматсса шартIирдаву яхьун бювхьусса Ленинград шагьрулул агъалинал жукура гьарцаннаву тарбия дурну душиву Ватандалухсса ччаву.

Жунма хъамабитан къабучIиссар та захIматсса чIумуягу, захIматшиву духIансса яхI биял хьусса агъалинаягу», – увкунни ванал.

Магьирлулгьрал къатлул ва библиотекалалул зузалт мероприятиялийн бивкIминнай «вихшалдарал лишанну» хьусса ччатIул касакругу бачIлай, буслай бия душманнал вив лавсун бивкIсса Ленинград шагьрулул виричувисса тарихрая

Школа бакъасса шяраву оьрму бакъассар

Лакрал райондалул бакIчи Зураб Куччаевлул хьунни ларгсса дуккавил шинай шинмай лавкьун бивкIсса Ххюлуссунал школа цIунил зузи баврил ялувсса батIаву.

Ваний гьуртту хьунни райондалул КIулшиву дулаврил управлениялул каялвчинал буржру чIумуйну биттур булаллисса Сулайман Шахмилов ва Ххюлуссунал шяраваллил бакIчи Сагьир Акаев.

БатIаврий ихтилат бия дуккавил идара анаварсса чIумул мутталий зузи баврия. Зураб Куччаевлул тапшур бунни бюхъайсса суратру ишла дурну, ва мурад бартбигьин.

Хаснува агьанну ккаккунни школалий дуклакисса оьрчIал шаллушин даву. Масъала чулийн бутансса ца чаранну КIицI лавгунни шяраву яхьунсса гьанчу бусса оьрчIру шагьрурда кIункIу баву.

«Ва хьинну агъамсса бурукинни. Школа – шяраваллил кьюкIри, гьанур. Школа бусса кIанттай бучIантIимур буссар. Школа лакьирча, шяраву оьрму левшуну гьантIиссар, гьунттийнин шяравалу цурдагу духлар-

гун гьантIиссар. Жунма чара бакъа аьркинссар зана дан оьрчIахъхьун шяраву дуклансса сант, шяраваллин тIурча – аргъ», – увкунни Зураб Куччаевлул.

Муния махъ райондалул бакIчи идарарттал каялвчитурал давил аьрххилий лавгунни Ххюлуссунал шяравун.

Цалчинна-цалчин, Зураб Куччаевлул ххал дунни школалул тагъар. Архсса шяраваллаву кIулшиву дулаврил бурукиннтту хьхьичIунсса ххуттай ккаккан багълай бушиву КIицI лаглай, КIулшиву дулаврил управлениялул каялвчи Сулайман Шахмиловлул ва шяраваллил бакIчи Сагьир Акаевлул тапшур бунни чьясса чIумул мутталий школалул даву цIу дуккан дан.

Муния махъ шяраваллил агъалинашалсса хьунабакъаврий ххал бивгьунни агъамсса бурукиннтту.

Зулайхат ТАХАКЪАЕВА

«Школарду ниттил мазрал луттирдал дузалну буссар»



Ларгсса ножмаркьини «Аьрасат – ттул тарихри» тисса тарихийсса паркраву Дагъусттаннал КИулшиву дулаврил ва элмул министр Яхия Бучаевдул пресс-конференция хьунни. Министрнал бусунни ларгсса шинал хIасиллая ва ялун дуркIсса шинал дуллантимунья.



2025-2026 дуккавил шинал республикалий зий бусса бур 1376 школа, вай школардай зий бусса бур 70 000-нния ливчусса зузалт. Вайнавугу 43 000-нния ливчусса педагогтал.

2025 шинал 5440 дуклаки оьрчIансса цIусса 15 школа тIивтIуну бур, 850 оьрчIансса 5 садикгу. Бусунни буллаи бушиву 19 школа ва 12 оьрчIансса багъ.

Министерствалул давриву ца хьхичIуншивуну кIицI ларгунни ЕГЭ дулаврил Аьрасатнал рейтинграй хьхичIунминнаваху бушиву, бусунни хьхичIва 84-мур кIанттай бивкIхьурча, утти 59-мур кIанттайн гъаз шаврия. КIива мукъуйну учин, топ – 60 кьокьялун Дагъусттангу багъшиврия.

«2025-ку шинал 34 выпускникнал ЕГЭ-лул 100 балл лавсунни, 28 выпускникнал 95-нния 99-ннийн бияннинсса баллу лавсунни кIира ва ххишаласса предметирттал, 1060 выпускник лайк хьунни «За особые успехи в учебии» тIисса цалчинмур даражалул медальданун, кIилчинмур даражалул вара медальданун – 871 выпускник. Рособназорданул ххуйсса кьимат бивщунни КIулшиву дулаврил даву сантирай хьхичIуннай даврин», – увкунни министрнал. Бусунни республикалийсса школардай шанма сменалий оьрчIру дарсирдайн заназисса иш бакъашиву ва садикирттайнсса сияхI чIаланну чIири хьушиву.

«КIира шинал мутталий бювхьунни садикирттайнсса сияхI кутIа дуван: 2024 шиндайди хьулий 10 381 оьрчI ивкIхьурча, 2025 шинал ахирданий ливчIссар 7 546, вайнавугу шанна шинавун бухханнинсса оьрчIругу чан хьуссар. Буссия – 4135, утти буссар – 2 799».

Министрнал балжину бусунни СВО-лий гьуртту хьуминансса ва миннал кулпатиртансса дуккавивусса кукулиннардагьу.

«7653 оьрчI яржа бияннин кьабивтун кьамул буссар садикирттайн, 15000-нния ливчусса оьрчIру укьа бигъалавгссар гьинтнил садикирттай. Вузирдаву 1500-нния ливчусса студенттал мурахас бивну буссар дуккаврих багъа булаврия, гьар зуруй стипендияртту ласайсса буссар 1300-нния ливчусса», – увкунни министрнал.

Конференциялий гьуртту хьунни республикалул парламентарал КIулшиву дулаврил ва



элмуллул комитетрал председател Елена Павлюченко. Ванил бусунни, дуклакминнан мюнпатсса 12 закон кьамул дуршиву гьашину цуппа каялувшиву дуллалисса комитетрал, ца хьхичIуншивуну ккалли дуллаливу оьрчIру ва жагьилтал захIмат ххирану тарбия баврил хIакъиравусса закон.

«ОьрчIру захIмат ххирану тарбия баврил даву хьхьара хьушивруву зарал чIалай, жу ва иширах кьулагъас дуварду, школардай захIматрал кабинетру цIу буккан буллалисса хьуннасса даву ширирКIуну най дуссар», – увкунни депутатнал.

Бусунни министрнал ларгсса шинал Ххувшаврил 80 шинал юбилейран хасну республикалий 139 мероприятие дуршиву, гьуртту хьушиву 674 000-нния ливчусса оьрчIру ва душру. Мукунма «Юнармиялул» дастгалу бушиву 42 азарунниха ливчусса дуклаки оьрчIру. Сайки циняв школардай душиву «Движение Первых» ккурандалул

филиаллу. Гьаннайсса, патриот зумунусса тарбия дулаврил даву лавайсса даражалый душиву. Буллунни ванахьхьун мадарасса суалугу.

Миллатрал прессалул вакилгалу бухьувкун, жулмур муданнасса дакIуцIуцаву дия миллатирттал мазурдил дарсирдал ялвусса. «Илчилуль» хьунама редактор Руслан Кьардашовлул буллауна укунсса суал: «Республикалий кьамул дунни ниттил мазру лахьхьаврил, ябаврил ва гьаз баврил программа. Ва программа бардигьаврил ххуллий, цуку-цукунмири зул министерствалул дуллантимунья агьамми давуртту? Тари Дагъусттаннал школардай ниттил мазрал дарсру дишаврил тагьар лайкьсса даражалыйн гьаз хьунтIисса ва хIатта кьатIаллил билаятирттал мазрайсса дарсру дишаврил даражалыйрагу ккаклантIисса?»

«Ниттил мазрал ва литературалул дарсру дишаврил программа Дагъусттаннай ишлану дуссар федерал программа-

лийн чул бивщуну. Федерал планнал дур жура-журасса вариантру, циняв классирттаву ниттил мазрал ва литературалул дарсру дихьлансса вариантгу гьуртту. Учебный план язи дугьансса ихтияр школардахь дунугу, жу циняв муниципалитетирттал ва школардал хьу-

ниттил мазрацIун бавкIусса суал. «Ниттил мазрал ОГЭ дулаву гьакьсса ххуйсса сипта дур, амма му экзамен дулун ччими лап чансса бур. Му чара бакъа дулунсса экзаменну цIакъ дуварча тIайлану кьахьунсса-рив? Ниттил маз ххуйну лахьлахь бувансса хIучча хьунссия, ичIувагу ишла булланссия гьалгъа магьир буван лахьхьин».

Ва суалданун Яхия Бучаевлул укунсса жаваб дуллунни: «Ниттил мазрал ОГЭ чара бакъа дулунсса экзаменну ккаккан дуван кьашайссар закондалул даражалый: федерал нормардал тIалавшиннарайн бивну, чара бакъа дулун аьркинсса экзаменнур оьрус маз ва математика. Жул задача – ялув духIаву бакъарча, му предметрахсса гьира бутавур. Дуклаки оьрчIал ва нитти-буттал цала хушрай, физикалул, химиялул ва цаймигу предметирттал кIанттай ниттил мазрал экзамен язи дугьавур жулва мурад, миккунну хьит тIун аьркинсса». Ниттил мазрал дарсру дишаврил тема аьч дуллай, депутат Елена Павлюченколгу кIицI лавгунни, ниттил мазру лахьхьаврил масъала так школардайн кьабувтун, ваниха циняв зун аьркиншиву. Школардайсса ца-кIира дарс дишаврия пайда кьахьунтIишиву, агарда кулпатраву, ичIува ниттил маз ишлану бакъахьурча. Щалва кулпат ва процессраву хIала-гьурттуу суку хьусса чIумал, хIасиллугу ххари бувансса хьанантIишиву.

Конференциялул ахирданий Яхия Бучаевлул министрствалушчал уртакьну зий, республикалул КIулшиву дулаврил ва элмуллул даву гьаз дулавриву бутIа бивхьусса хьхичIунсса журналистьтуран дуллунни наградарттугу. «Илчи» лайк хьунни кIира наградалун. Барчаллагьрал чагьар буллунни хьунама редактор Руслан Кьардашовлул. ОьрчIансса журналистика хьхичIуннай даврихлу ва ниттил маз ябавриву бутIа бишаврихлу ттуугу буллунни Барчаллагьрал чагьар.

Ниттил маз яшаврил ххуллий бихьлахьисса жулва захIмат хIисавгу хьуну, лавайну, лайкьну кьимат бишавугу жунгу бусравссар. Буржлувугу буллалиссару.

Патимат РАМАЗАНОВА

Лакрал энциклопедияну хьусса «Илчи» кказит

Цалчинсса гьантрая шихунмай кказитрай зий бура нагу. 1991-ку шинал январь зуруй кказит буклан бивкИуна, февральданий даврийн кьамул буллалисса приказ бивккун, бивкIра нагу кказитрай зун. Тани кказитрал коллектив дахьва-дахьва салкьи хьанай бия. Хьунмур редактор Качар Абачараевнал чIарав бия даву кIулсса, гьунар бусса творчествалул агьлу: Руслан Башаев, ХIасан КIурухов ва Казбек Мазаев.

Ххирасса буккулт, хIурмат бусса лак!
Гьашину, жунгу, зунгу ххирасса, бакъа къабучИсса жула «Илчи» кказитрал юбилейри. Январь зуруй 35 шин бартларгссар, 1917-ку шинал лакрал миллатрал виричусса арс Гьарун Саэдовулл буккан булла ивкIсса «Илчи» кказит цIунил итабакьлан бивкIния шиннай.

Ца анаварсса бушилий, янил лянI учиннин тIиссаксагу, ларгунни вайксса шинну. Ца чулуха, тарихрал лажин хIисаврай, (кказитгу тарихрал ца лажин дур) 35 шин чанну чIалай дур. Кказитрай бившумунил, бивсмунил хIисав-сан дуларчарив, лапва хьунмасса ххуллу бивтун бур. «Илчи» чил билаятирттайнгума бивну бур, бюхттул зунтурдал мицIайнгума лавхьун бур.



На бивкIсса чIумал кказитрай дахьва ца корреспондент зий ия. Мугу бия Шахьуйннал шьяравасса ПатIимат Бариева. МахIаттал хьанан бикIайссияв шагьрулий хьунма хьусса ванил мазрал аваданшиврий, пасихIшиврий. Гьирарай буккайссия ванил чивчусса гьарица хха. Цуппагу аьмал-хIал бавкьусса, дакI марцIсса инсан бикIайва. Махь ттун ванил душнишал, Ххадиджатлушал, журналистикалул отделениялий ца курсираву дуклан кьисматгу хьуна. Кказит булланнинма издательствалий зий бивкIун бия цIанасса жул дизайнер Зинфира ХIажиева. Му кIул хьусса Качар Абачараевнал вагу редакциялийн кIункIу бивну бия. КIулакьай Качар Абачараевнан зузалт язи бугьан. Шиккун увкIсса гьарицагу инсан ия цала даву ххирасса, жаваблувса. Ххуйну дакIний дур кказитрал цалчинсса номерду булканисса чIун. Чирисса чIумул дьинив кказитрал чIявусса, дакI тIайласса дустал хьуна. Туну, миллатрал кказитрах мякь бивккун бия лак. ТIайлассар, бия «вил чIирттараву ттул чIара» тIисса кунма, аьй лякьин анавар булканиссагу, чIиви-хьунсса гьалатI гьаз буллалиссагу. Ми хIакьинугу чан бакъассар. Амма ххинугу чIявусса бия кказитрах мюхтажсса, гьарица номердану ссакур духларгун ялугьлагьисса буккулт. Редакциялийн хьар бакъасса ци-бунугу багьанасав хьуну, кказит цила чIумал къабуккарча, къабиярча, жул



кабинетирттавусса телефону «инжит хьуну» дикIайссия. Хьуна «Илчилул» гьарца ишираву чIарав бацIайсса, цIакьсса дулгалу. Мигу чансса бакъая. Кувний - цавай, кувний - цайми. Амма кIицI къабувну битан къахьунссар, цалчинсса гьантрая хIакьинусса кьининин кказитрайн хан кьавхьуну, жул чIарав бусса, чумартшиврул бутIа ххисалану буллусса Сапарбаг Абдуллаев, Юсуп МахIаммадов, Илиясовхьал кулпат ва биялсса цаймигу.

Кказит ккалай бия, тIалавну бия, кказитрайн чичлай бия. ЦубутIуй редакторнал ттуин буккултрал чагьардалссагу буллан тапшур бивна. Ряхва-арулва чагьар, бюхьай ххисалагума, ца кьини бивкIсса чIунну шайва. Ми ккалан, миннуха зун гьира бия, хIатта чIарумур чIумал кказитрай бишуннин шалва чагьар цIунил ттунма чичлан багьарчагу. Буккултралгу, кказитралгу дахIаву душиврия ххарину бикIайссияв.

Буккулт кказитраха шеьрир-

дугума чичлан бивкIуна. Уттигу дакIний бур Шайх ЯхIияевулл чивчусса вай ххару:

*Я байлсса зияратчий,
ДакI марцIсса тарбиячий,
Азар хьин дай сававчий,
Ххирассара жун, «Илчий».*

Тай шиннардий кказитрал хIакьираву цIухху-бусу буллалийни, жул чIарав мудан ивкIсса Эса Халидовичлул увкунна: «Ва жула миллатрал хьуннасса хьхьичIуннайшивур, ххушва-

вур. На гьарица кьини кказит канил бугьан хьурдай тIий икIара. Кказит бучIайхту, на, кьалангу канил бивгьуну шьяикIара. Юх, гьалатIру ляхьлан бакъача, бахханасса махьвагу бакIрайн къабакьайвав тIий, навагу мазрал шьяравасса ттун кIулсса хьинну ххуйсса инсан уссия, милицанал зузала ЦIаххуй Муртузалиевич (аь. б.). Ца чIумал мунал увкунна: «Ва «Илчи» кказит ттун кIа Лаккуй школа бивккусса хьунни. Цанчирча, ттун дуккаву гьурбатрай дан багьссар. Мунияту Лакку кIанттугу, лакку мазгу, кIай жула шархьивгу, шархьал агьлугу, багьу-бизугу, хIасил, жува ца буссарув, жула тарих, география ттун му кказитрайхчин ххуйну кIул хьунни. Ттун учин ччива, «Илчи» кказитрал жула даража лавай бивссар, маз итхьаххан бивссар.

Ялагу, жува, лак, буру, къурух бившусса гьанна кунма, шала билаятрайх ппив хьуну. Гьарица шьяраву хьун ккурчIайн батIайсса кунма жьмат, жува цачIун батIлай, лагма лаган буллай буру ва кказитрал. Ва жунма бакъа чара бакъассар». Вана укунсса кьимат бившунна ттул дунал, ЦIаххуйл. Ча, цийвасса бурж ца ххисаланугу бартбигьлагьиссар кказитрал.

Утти бусанна нава цукун тIайлабавцIуссарав «Илчи» кказитрайн. ДакIний-мазрай бакъанма. Дагьустаннал универси-



Лакрал энциклопедияну хьусса «Илчи» кказит

тетрал филологиялул факультетгу кьуртал бувну, на жула шяраву, Ккурклив, школалий зий буссияв. Гьинтнил каникуллал чумал, дазул кьатГувсса путевка дирирну, Германнавун лавгссияв. Жул группалул каялувчигу ия обкомрай зузисса Зиявуттин Наметович тИсса табасаран. Цусса дуквавилл шин дай-дирхьувкун, жагьилсса пишкар ва партиялул член Хисаврай (коммунистгьурал партиялувунгу кьамул бувссара на Лаккуй), райкомрал тИайла бувккунав на Марксизм-ленинизмалул университетравун курсирдайн. Дуниял чИириссар учайхха, курсирдай хар-хавар бакъа хьунаавкьунни кИиц лавгсса университетрал проректорну зузисса Зиявуттин Наметович. Ва ххуйсса журналистгу ия, прессалущал хИала-гьурттусса ия. Дукваву кьуртал хьуну, удостоворениртту буллуну махь, ттуцлан гьан хьуну, увкуна: «Ттун ина школалухун ххававххуну, кИиккува ливчIун кьаччивав. Ина журналистнал ххуллу язи бугьарча, хьина, цIуну тИтлатИсса лакрал кказитрай зурча, цукунна?», – куну. Пикри банна учав. Пикри буллаи бунува, кьинигу ларгуна, ттувувагу журналистнал пишалухсса гьира чантI увкуна. Лавгра кказитрал хьунмур редакторну бивтсса Качар АбачараевначIан. Жул бутгахьал, ЧIийнал школалий архIал зий бивкIун (Абачара директорну, ттул ппу Пятали физкультуралул учительну), дусшивугу дия. Найбунува кьамулгу бувнав.

Вана укун лавсьсар на «Илчилийнсса» цалчинсса ша. ЦубутIуй кьамул бувнав корректорну, нукIува кИиц лавгсса куццуй, буккултрал чагьардалсагу буллаи. Байбихьулий жул бия 7-8 инсан усса чИивисса коллектив. Коллектив чИивисса бунугу, кказит буккайва лавайсса даражаллий. Ччяни гьаз хьуна коллективрал сий. Жул редакция бусса кИилчинмур зивулийсса зузалт, лакрал кказит тИтлайхту, зивулийх авурсса душру занан бивкIунни тИий, хьярчру буллан бикIайва. Кказит итабакьайсса цехравугу, лакку кказит нукIува тИтIин бивкIун бур, цехравун ххуйсса душру букIланшиврул тИий, мукунма хьярч-махсарттай бикIайва. Вай хьунисса, 11 зивулийсса, кказит-журналлу итабакьайсса кьатраву жул чИивисса редакция ччяни бусрав хьуна. Гьай-гьай, жул хьунмур редактор бия каялувчинал, творчествовалул зузалал опыт бусса, ябацIансса, буса-учин кIулсса инсан. Коллективрал вирдакIну бия журналистнал даву канилух дурксса шаэртал Руслан Башаев, ХIасан КIурухов, Казбек Мазаев. ВайннацIа лахьлай, хьит-шит тИий, хIарачат буллаи жугу бивкIру. Ца-кIира шинал даяив жул кказит, нукIува буклай бивкIсса, опыт бусса кказитирттал хьиривгу лавну, хьхьичIунгума ливчIуна, ччарчча бившумунил, ччарча чIалачIиндарал чулуха. Цу-цусса рубрикату, дахханаши-вуртту... ЖуцIа цайминнан лахь-



лахьисса кIанттурдугума хьуна. Ца шинай корректорну зийгу бивтун, яла корреспондентну цIакь бувнав на.

ПиртIуссия цаппара муданна дачин дансса рубрикату. Миннувах буккултран ххирасса (циваннив) криминалданул сводкарттугу, ххуллурдайсса ДТП-ттугу. Дакь даркьуна редакторнан цалчинсса репортажирттайгу. Ми дия ихтиярду дуручай органнал кьуллугьиртгацIун дархIусса. Таний ттуллас ия «Каскад» тИсса, ХIажимахIаммад ХIажимахIаммадовлул каялувшиннаралул оператив реагированиялул батальондалулу кьуллугь буллаи. Цаппарассалива миннашал патрульданийгу лавгсса. Яла циняв ихтиярду дуручай органну редакторнал ттуцIун цIакь дурна.

– Ва шярлуксса Андрианал мютIи дайссар циняв гужирдал структурарду, – куну, хьярч байва редакциялул зузалт хьамаллурашал кIул буллалисса чIумал. Пишалул ххуллийсса чIяруми наградартту ва бахшишругу вай структурардал чулухасса хьуна.

Хьуниминнангу дакI даркьусса, навагу рязину ливчIсса хьуна МахIачкьалалив дахьва тИвтIусса «Сы-Пин» тИсса китайнал ресторандалул хьуниминнашалсса, МВД-лул прессслужбалул каялувчиналсса, махь цува виваллил иширттал министрналсагау ва цаймигу интервьорду.

Жувагу жагьилсса буну, кказитгу цусса буну тИий бухьунсия, ляличИсса гьавас, гьирашавкь дия зунсса. Зун кьулайсса шартIру дакьанугу, цин лархьхьусса захIматшивуртту хьунадакьлай дунугу, кьулагьас кьадайссия.

Таний маршруткартту бакьая, транспортрал масьала захIматну бикIайва, хаснува гьарал-марххалтту бусса чIумал. Шаппайн чIалну бияйвав. «Илчи» ччаннай бацIан буллаи, жула дадан кьатта-кьуш хьамабивтун бур», – тИий, рихшантру дайва адаминалгу.

Зивулий жул хьяхьисса чIурду чан кьашайва, хаснува хьярч-махсартту ххирасса, мукьуй цIу бусса Тамара ХIажиева ва АьтIикат ХасмахIаммадова бивкIун махь. Рамазан Рамазановлул (Илчи-Рамазан) учайссия) ва миннал даяивсса ихтилатру – цила бикIайкунсса кьамалдия. Жул хьяхьавурттал чIурду ялувми зивурдайнгума бавну бикIайва.

«Илчи» кказитрайра на, шалва коллектив лагма лавгун, шаргу буллусса. Ттул хьатIи жул коллективраву хьхьичIва-хьхьичIсса хьатIи хьуна. Ттун арс увсса чIумал «Илчи Рамазаннул» ганан «Илчиненок» тИсса ялун цIа дирзуна. «Илчилул» ттун журналистнал пиша муксса ххира хьун бувнахха, зий бунува Дагьустганнал университетрал журналистикалул отделения-

лиингу бувхра. ДакIнийри диплом буручлачисса кьини. На дипломрал даврия буслан байбешиннин, танивассагу, уттиссагу ттул преподавательнал хьярчрай кИиц лавгуна на нукIувагу цацIава дуклай бивкIшиву, цаьтува личIи хьун кьаччай, уттигу бувкIшиву. Бувсуна мукунма на лакрал кказитрай зий бушивугу. Защиталул комиссиялул хьунаману ивкIсса проректоргу улувкьуна ттухь миллатрал пресалул хIакьираву, шартIирдая, харжирдая, тиражрая цIуххубусу буллаи. Ттул харж лапва чIиви бивзун (мяйжаннугу, кказитрал зузалтрал харжру та-бухурчагу дахIалай чинсса кьабивкIссар), ганал цIувххуна: «Яр, му харжирацIух ина му кказитрай ссал бувгьуну буре, вин цамур даву ляхьлай дакьарив?» – куну.

– Ттулва миллат ххирану тИий, – куну, жаваб дуллуссия нагу. Циняв пиш-пиш тIун бивкIуна. Ганалгу хьярч бувна: «Везет же лакцам, что у них такие патриоты», – куну. «Илчи» кказитрал зузалт, мяйжаннугу, циняв патриотьтал бия. Циняв бия энтузиастьтал. Жун бувчIлай бия жура хьинну агьамсса, багьа бишун кьашайсса даву дуллаи бушиву. БувчIлай бия, Качар Абачараевнал тIийкун, жува «штучный экземплярду» хьанахьшиву, жура дуллалимур гьарнаша дан кьашайшиву. Мунийнгу на ялу-ялун мукIру хьанай буре.

Шиная шинайн жул коллектив хьунма хьанан бивкIуна. Ялун бувкIмигу давриву дакI дирхьусса, коллективрацIун бавкьусса, бюхьу-бажар бусса хьунни.

Ца-ца чIумал, кказитрал подшивка ххилтIу дуллаи, на бикIара шаллусса лакрал энциклопедия чивчуну бур жула зузалтрал тИий.

ДакIниву ххаришиву дикIай, 35 шинал лажиндарайсса ттула захIматрал бутIагу буну тИий шиву. КИиц лаган ччива мукунма, ГьунчIукьатIрал шяравасса Руслан Кьардашов учIайхту, жул кказитрал чIалачIин, дицкуц, дизайн чIаланну ххуй хьуна. – Зул кказит канил бугьанма тIааьни, – тIун бикIайва вайми миллатирттал кказитирттай зузисса жул коллегахтул.

Цанасса чIумалгу, кказитрал хьунама редактор Руслан Кьардашов цала кьуллугьрай, кказит итабакьаврил давриву, хаснува ттизаманнул компьютердал технологиярттаву ца яла хьхьичIунма ва гьунар бума ур. Вайми редакциярая ванахь цIуххин, маслихIат бан букIлакИсса чансса кьабикIай.

Жул цинявппа зузалт личIиличИсса наградарттан лайкь хьусса, журналистгьурал даянивсса личIи-личИсса конкурсырдай ххув хьусса бур. Чансса бакьар коллективраву лайкьсса царду ларсьсагу.

Жул зузалтрахьхьунгу, буккултрахьхьунгу, чIарав бацIултрахьхьунгу цIуллушиву дулуннав Заннал. «Илчи» кказитрал иш бачиннав. Уттиния тихуннайгу чIярussa юбилейрду дуллансса каша-кьудрат дулуннав.

Аьпа баннав, личIи-личИсса шиннардий редакциялий зий, кказит хьхьичIунмай бан, ванил даража гьаз бан цала-цала захIматрал бутIа бивхьусса Абачара ХIусайнаевлул, Юсуп Хаппалаевлул, Миясал Шурпаевал, ХIасан КIуруховлул, Казбек Мазаевлул, МахIаммад Омаровлул, МахIаммад Аьлиевлул, Цийшиял ХIажимурадлул, Залимхан ХIусмановлул, Рамазан Рамазановлул, ТахIсин Жанаевлул, Сулайман Мусаевлул, Амин Аьбдуллаевлул, ПатIимат Бариевал, Аьйшат Кацаевал, Зумрут Омаровал, Загьрани Аьбдуллаевал, Чанкура КьурбанмахIаммадовлул, Аминат МахIаммадовал, Куматусса МахIаммадбагдул, Аьбдулбасир ТIагьировлул.

Андриана АЬДУЛЛАЕВА



ИТНИ, 9 ФЕВРАЛЬ

05.00 «Доброе утро». 09.00 Новости. 09.25 «Молный приговор». 10.15 «Жить здорово!» (16+).

01.05 «Подкаст.Лаб». (16+). 03.00 Новости. 03.05 «Подкаст.Лаб». (16+).

ТТЛАТ, 10 ФЕВРАЛЬ

05.00 «Доброе утро». 09.00 Новости. 09.25 «Молный приговор». 10.15 «Жить здорово!» (16+).

03.00 Новости. 03.05 «Подкаст.Лаб». (16+).

АРВАХИ, 11 ФЕВРАЛЬ

05.00 «Доброе утро». 09.00 Новости. 09.25 «Молный приговор». 10.15 «Жить здорово!» (16+).

00.10 «Подкаст.Лаб». (16+). 03.00 Новости. 03.05 «Подкаст.Лаб». (16+).

ХАМИС, 12 ФЕВРАЛЬ

05.00 «Доброе утро». 09.00 Новости. 09.25 «Молный приговор». 10.15 «Жить здорово!» (16+).

23.00 «Большая игра». (16+). 00.10 «Подкаст.Лаб». (16+).

НЮЖМАР, 13 ФЕВРАЛЬ

05.00 «Доброе утро». 09.00 Новости. 09.25 «Молный приговор». 10.15 «Жить здорово!» (16+).

01.20 «Подкаст.Лаб». (16+).

ХХУЛЛУН, 14 ФЕВРАЛЬ

06.00 «Доброе утро». Суббота. 09.00 «Умницы и умники». (12+).

06.55 «Часовой». (12+).

АЛХИАТ, 15 ФЕВРАЛЬ

05.00 «Доброе утро». Суббота. 06.00 «Утро России». Суббота.

РОССИЯ 1

ИТНИ, 9 ФЕВРАЛЬ

05.00 «Утро России». 07.35-07.41 Вести-Дагестан. 08.07-09.10 Вести-Дагестан.

Каневский и Мария Берсенева в детективном сериале «Райский». [16+]

ТТЛАТ, 10 ФЕВРАЛЬ

05.00 «Утро России». 07.35-07.41 Вести-Дагестан. 08.07-08.10 Вести-Дагестан.

03.00 ВЕСТИ. 03.30 Владимир Жеребцов, Леонид Каневский и Мария Берсенева в детективном сериале «Райский». [16+]

АРВАХИ, 11 ФЕВРАЛЬ

05.00 «Утро России». 07.35-07.41 Вести-Дагестан. 08.07-08.10 Вести-Дагестан.

Каневский Мария Берсенева в детективном сериале «Райский». [16+]

ХАМИС, 12 ФЕВРАЛЬ

05.00 «Утро России». 07.35-07.41 Вести-Дагестан. 08.07-08.10 Вести-Дагестан.

нева в детективном сериале «Райский». [16+]

НЮЖМАР, 13 ФЕВРАЛЬ

05.00 «Утро России». 07.35-07.41 Вести-Дагестан. 08.07-08.10 Вести-Дагестан.

нева в детективном сериале «Райский». [16+]

ХХУЛЛУН, 14 ФЕВРАЛЬ

05.00 «Утро России». Суббота. 08.00 МЕСТНОЕ ВРЕМЯ. СУББОТА.

АЛХИАТ, 15 ФЕВРАЛЬ

05.30 Карина Андоленко Евгений Пронин в фильме «Китайский Новый год». [12+]



ИТНИ, 9 ФЕВРАЛЬ

07.00 Время новостей Дагестана. Итоги. 08.00 Мультифильмы (0+).

03.45 «Угол зрения» (12+). 04.15 «Сердце война» (12+).

ТТЛАТ, 10 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).

03.40 Д/ф «Алексей Толстой. Никто не знает правды» (16+).

АРВАХИ, 11 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).

03.45 Д/ф «Юрий Стоянов. Поздно не бывает» (16+).

ХАМИС, 12 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).

03.45 Д/ф «Юрий Стоянов. Поздно не бывает» (16+).

НЮЖМАР, 13 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).

03.45 Д/ф «Юрий Стоянов. Поздно не бывает» (16+).

ХХУЛЛУН, 14 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).

03.45 Д/ф «Юрий Стоянов. Поздно не бывает» (16+).

АЛХИАТ, 15 ФЕВРАЛЬ

07.00 Время новостей Дагестана. 07.20 Передача на табасаранском языке «Мил» (12+).



ИТНИ, 9 ФЕВРАЛЬ

04.50 Т/с «Пес». (16+). 06.30 «Утро. Самое лучшее». (16+).

00.30 «Ч.Т.Д.» с Маргаритой Симониной. (16+).

ТТЛАТ, 10 ФЕВРАЛЬ

04.30 Т/с «Пес». (16+). 06.30 «Утро. Самое лучшее». (16+).

01.05 Т/с «Вокзально-криминальный ансамбль». (16+).

АРВАХИ, 11 ФЕВРАЛЬ

04.30 Т/с «Пес». (16+). 06.30 «Утро. Самое лучшее». (16+).

01.05 Т/с «Вокзально-криминальный ансамбль». (16+).

ХАМИС, 12 ФЕВРАЛЬ

04.30 Т/с «Пес». (16+). 06.30 «Утро. Самое лучшее». (16+).

01.05 Т/с «Вокзально-криминальный ансамбль». (16+).

НЮЖМАР, 13 ФЕВРАЛЬ

04.25 Т/с «Пес». (16+). 06.30 «Утро. Самое лучшее». (16+).

01.05 Т/с «Вокзально-криминальный ансамбль». (16+).

ХХУЛЛУН, 14 ФЕВРАЛЬ

04.40 Х/ф «Любовь под грифом «Совершенно секретно».

01.05 Т/с «Вокзально-криминальный ансамбль». (16+).

АЛХИАТ, 15 ФЕВРАЛЬ

04.50 Х/ф «Любовь под грифом «Совершенно секретно».

«Илчилул» календарь Ва нюзмардий бувссар:

Февраль зурул 2-нний 1969 шинал увссар ДР-лул Халкьуннал Мажлисрал депутат **Марат Илиясов.**

Февраль зурул 2-нний 1948 шинал увссар Дагъусттаннал халкьуннал артист **Шамил Керимов.**

Февраль зурул 2-нний 1893 шинал увссар медициналул элмурдал доктор, профессор **МахIаммад Къажлаев.**

Февраль зурул 7-нний 1984 шинал увссар Аьрасатнал Виричу **МахIаммад Исабакиев.**


Февраль зурул 7-нний 1944 шинал увссар Дагъусттаннал цIанихсса дирижер **Рамазан ХIажиев.**

Февраль зурул 8-нний 1863 шинал увссар бусурман диндалул аьлимчу, чичу **Муркъилинахьал Юсупкъади.**

Февраль зурул 8-нний 1949 шинал увссар АьФ-лул культуралул лайкъ хьусса зузала, «Дагестан» ГТРК-лул директорнал хьиривчу **Ссалам Хавчаев.**

Февраль зурул 8-нний 1940 шинал бувссар филологиялул элмурдал кандидат, публицист **Роза Эльдарова.**

УрчIалла шинал юбилей



Вай гьантрай оьрмулул 90 шин хьунни ххаллилсса лаккучунан, **ХIажинал арс Къаллаев Шамиллун.** Ва увну ур КIямашав, шяраву икIу, Лаккуй икIу, цIа дурксса, бусравсса, хIурмат лавайсса Къаллал ХIажинал хьунмасса кулпатрау.

ЗахIаматсса дьэвилул шиннардий Шамил, чIивисса оьрчI, хьуна адамина куна, зий ивкIун ур шардассагу, колхозравуассагу давурттай.

Шанна шинай Украиннай къуллугъу бувну, зана ивкIун ур буттал шяравун. Зун ивкIун ур цанна ххуй дирзсса шофернал даврий. Машина ххуйну

кIулсса, даву ххирасса, хасиятрал авкъусса Шамил, председателнал цала машиналий зун увцуну ур.

Цала оьрмулул дуснашал, аьпа биву, Фаридашал, Шамиллул эьратсса къаттакъуш бувну бур. Къатригу дурну, МахIачкъалалийн ивзун ур, ххаллилсса оьрчI ва душ хьуни бувну, минналми оьрчIру тарбия бувну, хьуни бувну бур. Яла, ххуйсса зузала-шофер ХIисаврай, Шамил гьан увну ур цамур хIукуматрайн – Ливиянавун шоферну зун.

Шамил гьуртту хьуссар 1988 шинал дуньял сукку хьуну, левкъусса Спитак шагьру цIу буккан буллалийни ва 90-ку шиннардий Мичихичнаву хьусса дьэвиллий ппив бувсса Грозный шагьру цIу буккан буллалийни.

Пенсиялийн увккун махъгу, цIулул-сагъшиву дуссаксса, Шамил бусраврай шоферну зий ивкIун ур. Цала ппу куна, шяраваллил аькълукаргу ур Шамил.

Ванал бувсса хьунмасса захIматрах, дурсса даврих, ванияр тинайгу чIарав ацIаврих барчаллагьгу тIий, чIа тIий буру Шамиллун цIулул-сагъсса оьрму, оьрчIаясса ва оьрчIал оьрчIаясса ххаришиву, Аллагна цIими, барачат.

ГьунчIукъатIрал, КIямашрал жьматирттал чулуха барча дуллай Шамил увсса кьини, ванан, кулпатран чIа тIий буру ххари-хьиншивуртту.

ГьунчIукъатIрал Ккурандалул председатель ХIажибутта ХIУСАЙНОВ



Дагъусттан Республикалул бакIчинал Указрайн бувну, цIуну сакин бувсса, ДР-лул бакIчинал Гунсса Хьунисриннал советрал председателнал хьиривчуну ивтунни Рамазаннул арс Шалласуев Шалласу.

Му хIурмат лавайсса даврил къуллугъу барча буллай, чIа тIий буру жуна цинявннан ххирасса, бусравсса Шалласун цIулулшиву, цIу-цIусса ххуй-хьиншивуртту. Мукуна бюхътяхъа ххинува итаннав ина – агьилминнавугу агьилну, жагьилминнавугу жагьилну!

«Илчилул» редакция

Нинушивугу виричшивур



Вай гьантрай Цусса-Влакрал райондалийсса Шушиннал шяравасса Раисат Айдиеван дуллунни «Нину-виричу» тIисса бусравсса цIа.

АцIва оьрчIал нину Раисат Айдиевал сайки 30 шин хьуну дур ЦIуминалийсса Цуссалакрал райондалул азарханалий акушеркану зий.

«Кулпатрал гьану цIакъ бавриву ва оьрчIан лайкъсса тарбия дулавриву бивхьусса захIматрахлу «Нину-виричу» тIисса цIа лайкъ дурссар Раисат Айдиевал», – тIий, чивчуну бур Аьрасатнал президент Владимир Путиннул бувсса ХIукмулий.

ХIурмат бусса Раисат! ЧIа тIий буру вин цIулулшиву, гьарица ишираву тIайлабацIу, оьрчIая тирханну.

Имара САИДОВА

Вирттал бат къашайссар



МахIачкъалалив Аьр-Май славалул музей-рару тIиртIунни «Герои без вести не пропадают» тIисса хасьсса аьралий операциялий ятIатIар бакъа бакъа хьуминнан хас дурсса фото-выставка. Мероприятие сакин дурну дия «Сила матерей» тIисса хасьсса аьралий операциялий чувшиврий жанну дуллуминнал гьанчунал ккурандалул.

Суратирттай дия хасьсса аьралий операциялий ятIатIар бакъа бакъа хьуминнал суратру. Дагъусттаннайсса «Бессмертный полк» штабрал каялувчи Марат Аьлияровлул кIицI лавгунни

Дагъусттан мударгу машгьурну бивкIшиву вирттаварал.

«ЯхI, кьирият, ватан ххирашиву – вай хасиятру Дагъусттаннал агьулданучIа даин хьхьичIунсса ххуттай диркIссар, никирая никирайн хIурматрайн най дурссар. Мунияту вирттаварал цIардугу жучIара бюхттулсса кьиматрайн дуссар, миннал цIарду ядансса давурттугу дуллай буссар. ЖучIава тачIав къабивкIссар, бигу-къабикIантIиссар «ятIатIар бакъа бакъа хьусса вирттал». Тай мударгу жущала, жула дакIурдиву буссар», – увкунни Аьлияровлул.

Зулайхат ТАХАКЪАЕВА

СЛУЖБА ПО КОНТРАКТУ

НОВЫЕ УСЛОВИЯ ДО 31 МАРТА

2 млн руб. – от РД через Полк резерва

Единовременная выплата

2,5-2,9 млн Р*

Зарплата **от 210 тыс Р**

400 т.р. – РФ, от 100 до 500 т.р. – от муниципалитета

117 фед. номер

Пункт отбора по РД
8 (989) 484-69-95

Контрактрайну аьралуннаву къуллугъ буллан къамул буллай бур

СОЦИАЛ ХIАЛЛИХШИННУ ВА ГАРАНТИЯРТТУ:

- бюхълай бур чяни къатри ласун Аьрасатнал Обороналул министерствалул счетрайну накопительно-ипотечный системалийчыл;

- къуллугърал къатри дулайссар ягу лаякъатрахлу лахъаву (компенсация) дайссар;

- Аьралуннал медициналул азарханалий уква ххал увайссар, хьин айссар ва реабилитациялий итайссар;

- Федерал бюджетрал счетрайну оьрмулул ва цIулул-сагъшиврул страхование дайссар;

- 20 шинайсса къуллугъ бувну махъ хIаллихшиндарал (льготная) пенсиялийн уккайссар;

- талатаврил иширттал ветераннал статусугу, мунин хасьсса хIаллихшиннугу ккаккан дайссар;

- Аьрасатнал Федерациялул субъектирдал цал дулайсса ялун ххи дурсса арцу (единые дополнительные выплаты) ва гарантиартту контрактрайну къуллугъ буллалиминнан;

- кредитрал ва налогирттал каникуллу;

- оьрчIру вузирдаву дуклаки буллансса бюджетрал кIанттурду;

- контрактниктуран ябайссар цивппа зий бивкIсса зузи кIанттурду;

- оьрчIру уква бигьалаган тIайла буккайссар цIулулшиву цIакъ дайсса гьинтнил лагерьдайн.

Аьралуннаву къуллугъ буллан язи бугъайсса кIанттурду зий бур жула циняв шагьрурдай ва районнай.

Дагъусттаннай мукуссса кIану: **8(989) 484- 69- 95**

ДР-лул Военкомат: **8(8722) 68-16-08**

«Тун ххирар чичлан оьрчансса назмурду»

Бувну бур Жанна 1972 шинал Тпаннул ЦувкИуллал шяраву, агьалинан бусравсса МахИаммадахьал МахИраннул ва Аьйшатлул хьунмасса кулпатраву. Шиккува ххуйну школагу къуртал бувну, дуклан бувхун бур Дагъусттаннал пединституравун, оьрус ва лакку мазрал учительтал хИадур байсса отделениялийн. 1997 шинал му отделениягу къуртал бувну, лавсун бур оьрус ва лакку маз дишайсса учительнал диплом. Гьаннайсса, ва хьанай бур ларайсса кИулшиву дусса лакку мазрал учительница. Амма ванин цилва пишалий лахьи лагансса къисмат къавхьуну бур, ичИаллил къайгьурдалмур иш кИу хьуну.

Лакку мазрал муабллимнал даврий лахьи къалагарчангу, ва тачИаввагу мазрая арх бувцун бакъар. 2023 шинал итабавкъуну бур «ТутИал макъ» тИсса шеърирдал жуж. Ва луттирал хьхьичИмукъуву Дагъусттаннал халкъуннал чичу, шаэр Мирза Давыдов Жаннал творчествалун ххуйсса къимат бишлай, чичлай ур: «Ва Жаннал лагрулул хьун бакъасса, амма мяналул авадансса шеърирдал жуж на ккалли бавияв шаэрнал цила буттал кИантгухсса, ххялтИа дурксса лакрал шяраваллихсса ччаврил ва дард-хажалатрал макъаннан».

Дюхъаннав Жаннал вайгу, вайннуцунсса цаймигу макъанну, ялу-ялун мяналулгу, пикирилулгу авадан хьанай. Умуд бишин буллаллисса бювхьусса ххару чансса бакъар ванил назмурдаву. Ларгсса шинал Жаннал итабавкъуну бур «Бюрхул оьрчИ» тИсса оьрчансса жуж. Вайнну-васса цаппара бишунну цахьис махьату «ЧимучИалтуйгу».

- – **Жаннай, та байбихьура ина чичлай, цалчин чивчусса шеъри ягу хавар дакИний бурив, сса-хасса буссия?**
- На байбихьура чичлай ДГПУ-лул студенткану бусса

Декабрь зуруй, Дагъусттаннал Чичултрал союзрал лакралмур дсекциялий гъаз бувна КИилчинмур ЦувкИратусса МахИраннул душ Аьлиева Жанна Аьрасатнал Чичултрал союзравун къамул буваврил масъала. Ттунна цуну баллаллисса цИа духьувкун, на ванил оьрмулия, чичурдая ттунмагу хавар бикИан кИул хьуссияв ванишал. Буккултрангу кИулну бикИан бував кказитрайнсса ихтилатгу.




Чумалва, цалчинсса назмурду чирчуссия ттулва нитти-буттаха, буттал кИанттуха (ттулла шяраваллиха). Чичирчагу, амма, инсантуравун буккан буван сикъаслай, ялун къабуклай бивкИра.

- – **Вин ссая чичлан ххирар? Хьуниминнан чичлан ххирарив, оьрчИан?**
- Ттун ххирар чичлан тИабиабтрая, оьрчИшиврул чИумая, нитти-буттахаьал захИматрая, та чИумалсса багьу-бизулия.

ХьхьичИ ппурттуву на чичлай байбихьуссияв хьуниминнан, яла оьрчИанссагу чичлан бивкИра, гьира багьну.

- – **ОьрчИру луттирду ккалакки буваншиврул ци буллан аьркинну бур?**
- ОьрчИру луттирду ккалакки баншиврул, цалчинма - цалчин, буккин-чичин лахьхьин буван аьркинну бур. Гайннавун гьира бутан, оьрчИашалсса ихтилат, гайннахь бусласисса хавар – махь лакку мазрай буслансса



аьркиншиву дур.

- – **Цукунсса мурад бур вил творчествалул ххуллий, ссаха зий бура цИанакул?**
- Творчествалул ххуллий ттул яла хьхьичИунмур мурадгу, гьайгьай, лакку маз ябавриву, бухлаган къабитавриву ттулвамур бутИагу бишинсса бур. Мунияту ттушава бюхьайссаксса чичлай бура лакку мазрайсса назмурду, оьрчИансса хаварду, цинявннал ккаланшиврул, мюрщи-хьуни къаувкуну.
- – **Оьрус мазрайгу чичарав?**
- Оьрус мазрайгу чичара. Вана укунсса назмурду дур: «Письмо на фронт», «Грусть», «Осень», «Спасибо за жизнь», «Зима» ...

ЧИун хьусса чИумал лакку мазрая оьрус мазрай таржума буван шаймур бувара, лакку маз къакИулминналгу буккиншиврул.

- – **Нава щинна чичлаччусса, гьунтгий-сара къаучирча, сара-къия лакку мазрай буккинчичин кИулсса оьрчИагу къаличИан най ур тИсса пикри буххайрив?**
- Нава щинна чичлаччусса тИсса пикри ттул бакИравун ччя-

нива бувххунни, тИайлассар хьинну чансса бур, нукИува увкусса куцудуй лакку мазрай чичин ва буккин кИулсса оьрчИру, мукунма хьунимигу. Мунияту ттул бур хьунмасса умуд жула лакрал халкъуннайн, гьаманки лакку маз ябансса, гъаз бувансса кумаг цаннан-ца буллансар тИсса. Бурхха лакку маз лахьхьин буллаллисса центрду тИтИлай, мигу, мивун заназимигу гьарза хьананхьуви.

- – **Лакку маз ябаву мурадрай хьхьичИва-хьхьичИ лякъин аьркинсса чаранну цуми бур?**

– Лакку маз ябаврил хИакъираву хьхьичИва-хьхьичИ байбишин багьлай бур цума-цаннангу, цала-цала кулпатиртгяту, шаппа оьрчИашал гьалгьа тИун лакку мазрай.

- – **Буси лакку мазрал учитель хИсаврайсса пикригу: лакку маз лахьхьин буллалаврил хИасиллу ххуй дуван ци буллан аьркинну бур? Дарсру дишаврил къайда, оьрчИру кИункИу бувансса, машхул бувансса чаран?**

– Учителтурал дарсирдай оьрчИан гьира бутан ишла буллан аьркинни лакку мазрайсса жура-журасса тИуркИурду. Учителнал ца ссятрайсса дарсирал оьрчИан цибунугу лахьхьин буван захИматри. Нитти-бутташалу маслихат бувну, оьрчИан гьира бутансса лакку мазрайсса кружокру дуллан аьркинни, ялун ххи дурсса дарс хИсаврай. БучИия ялагу, гьилишиву дагьсса чИумал, экскурсияртту буллан, лакку мазрай буслай гайннахь лелухантрая, уртту-тИултая, жанавартрая, миннул тИуллая, дуняялул караматшивуртгяту. Вара журулул цаймигу мероприятияртту дуллан. Уттизаманнул каширдая, интернетрая, цифрулул дуняяллийсса хьхьичИуннайшивуртгяту мюнпат ласун, ниттил маз лахьхьин гьира бутанну ишла дуллан ва лахьхьин ччиминнан кабакьу бикИанну мюнпатну зузи дуван аьркинни.

Ихтилат бувсар П. РАМАЗАНОВАЛ

Зулва кказит-журналлу ябуваншиврул

- **Ина «ЧИавалачин» журналданийн подписка дував?**
- **Му уттигу итабакълай буссарив?**
- **«ЦИубарз» журналданийн дував?**
- **Мугу буссарив? «Зунттал хьами» тИсса журнал бушиву кИулли, буттарессичИа ккавкунни.**

Шукрурхха ва къажагьилсса инсаннан «Зунттал хьами» журналданиявагу хавар бусса. Буниларив, уттигьанну «ЧИавалачин» журналданул редактор Сиянат ХИажиевал дурсса, бувагу 50 экземпляр чивчуну бур, подпискалун кумаг бувара тИсса, аьратталсса оьвчаву социал сетирдай кунначИан кув гьан дулла булукьуну бия. КИия-шама инсаннал хасну ттучИангума оьвкунни, цукун дувантИссар подписка тИий. Цилва Сиянатлулгу ччясса мутталай чИарав бавцунни, подписка дузал дунни тИий, бар-

чаллагь увкунни. Гьаннайсса, лакрал дакИурдивунсса гужсса къутИлил баймур бунни, хИасиллугу хьунни. Хьхьикьини буссар социал сетирдай, хасну вотсап группардаву лакку маз ябан аьркиншиврия буслайгу, чичлайгу. Дуссар лозунгу, хьазамрал улттуйх заккунттугу бишлай, «ххирасар ттун лакку маз!» тИсса мукИрушиннарду. Ва иширай чИурчИав дунни хИурмат бусса чичу ХИадисхьал ХИадислулгу, лакку маз ябавриха зузиссару тИсса буцири группарду бунува, подписка дуллай бакъар тИий, багьвай аьй дуллай. Зат бакъар, ми ккуруанну, группарду лакку мазрайсса гьалгьавагу буван бикИанссар. Лакку мазрайсса гьалгьа бушивува пайда бушиврун ккалли байсса замана бувкИун бур. Нигь рутлатимур вари. Циванни школардал директортурал ва лакку мазрал дарсру

дишайсса учительтуралвагу, Сиянат леххаву тИутИи къабувну, цалва оьрчИан литературалул журналлу къачиччусса? Нину-ппу чантИ къаувкусса бухьурча, учительтал, дирекциягурив къулагьас дакъасса бикИан аьркинсса. ТтучИан ттучИанма оьвтИун бикИай, оьрчИансса лакку мазрахасса, буттал кИанттухасса, Дагъусттаннахасса назмурду ххал дувача, гьан дувакъай тИий. ТачИав инсаннахьхьун на библиотека ягу архив бакъара къаувкуссар. Шаймур бувсар, лякъин хИарачат бувсар. Уттигу, кИу къабивзун буванна шайсса кумаг лакку маз яшаврил ххуллий. Амма, зулла канилу, итталу ми назмурдугу, оьрчИансса лакрал литературагу мудангу дикИаншивруллагу бучИирхха школардайн, садикирттайн журналлу тИалав буван.

«Лакрал районнай 36 школа буссар. Гьарца школалул

ххю-ххюва журнал чичирчангума 180 экземпляр хьанай бур», - тИий ур халкъуннал чичу Мирза Давыдов. ХИукуматрал кабакьу бакъар учин къахьунссар, бурхха миллатирттал мазурдийсса журналлу, кказитру, театр, радиотелевидение. Гьар шинах, подпискалул чИун гьан хьанан дикИайхту, жугу подписка дуваракъай тИсса чИатИалтрайн кИурабаяру. Майжанссар, цивпа хьхьичИунмай хьуну, дуллаллиссагу чансса бакъар. Миллатрал маз ябаврил ххуллий чИатИалтрайн кИурабаяругу оьвкишиву дакъар, лахьунигума къамул банну. Жул хьунмур буруккин цамур бур. Подписка дузал хьурчангу, кказит-журналлу ккалаккими цукун ябанну, лакку мазрай буккин-чичин кИулми ялу-ялун чан хьананхьисса чИумал тИсса. Гьарцагу экземплярданул заллу уну ччай буру, буккулт буну ччай буру, гьамин. Щаллу-ккурккисса лакку кказитрайгу, журнал-

данийгу буккинмур бакъа къабикИайссар лаккучурат тИсса инсаннан. Ккаларчанни кказитирттайгу, журналлайгу мюнпатмур лякъинтИсса.

Цамур цичИав бакъахьурчангу, миллатрал кказит-журналлу канил бугьансса цИакьсса хИучча – цалсса лакку мазрайсса кказит-журналлу дуняяллийн буклай бушивур. Муниятуру жугу, подписка дувара тИий, миннатру буллай хьирив булаккисса.

Подписалиясса ихтилат тани хьунама редакторнал хьиривчуну зий ивкИсса шаэр, ХИасан КИуруховлул, аьпа бивул, къуртал бувна укунсса мукьурттийну: «Чичараярттал зунма зулва миллатрал кказит!». Вай махьрура нагу хИакьину тикрал буллаллисса. Зулва кказит-журналлу ябуваншиврул хИакьину зуяту аьркинсса цалчинмур кумаг – подписка давур.

Патимат РАМАЗАНОВА

Студентътал барча бунни

Аьрасатнал Студентътурал къинилул хьунийн ДР-лул культура-лул министр Зарема Буттаева гьуртту хьунни Дагъусттаннал паччахьлугьрал университетрал актовий залдану хьхьичунсса студентътуран наградартту дуллалисса шадлугьрай. Министрнал барчаллагь увкунни ректорнахь ва студентътурахь республика-лул магьирлугьрал оьрмулуду дуллалисса чялишсса гьурттушин-дарахлу.



«Дакъинийхтуну барчаллагь тий бура личи-личисса культу-ралул проектирдаву гьуртту хьанай, жула авадансса ирс ябаврил ххуллий цала тикрал къашайс-са члу ва махь ишла буллай бу-шиврухлу, так ца университе-трал бакъассагу, шала республи-калул пахрулун лайкъну дуклай бушиврухлу», – увкунни Зарема Буттаевал.

ДГУ-лул ректор Муртазали Рабадановлул къичи ларгун-ни махьсса шиннардийсса сту-дентътурал ккаккяртту. Був-сунни 2025 шинал универси-тетрал къавтIаврил ансамбль «Мой Дагестан» ххув хьушиву шалагу Аьрасатнал Студентъту-

рал интлий, университетрал во-лейболистътурал мусил медальлу ларсун душиву шалагу Аьрасат-нал Гъинтнил универсиадалий.

Студентътурал ккаккандурун-ни балайрдал ва къавтIавурттал программа.

Граморту ва барчаллагьрал чагъарду студентътуран буллун-ни ДР-лул Халкъуннал Мажлис-рал Культуралул, жагьилтурал, спортрал ва туризмалул коми-тетрал хьунама Мурат Пайзул-лаевлул, жагьилтурал иширттал министр Камил Саэдовлул, спор-трал министр Сажид Сажидов-лул ва цаймигу бусравсса хьа-маллурал.

Зулайхат ТАХАКЪАЕВА



Вихълив тивтунни цусса школа

Январьданул 28-нийн Вихъул-лал шяраву хьунни агьамсса иш. Ва бучину бухьунсар шяра-валлил тарихрал луттирайн лахь-ан бубан.

Вихълив цалчинсса школа тивтуну бур 1928-ку шинал. Школа бубну бур «халкъуннал стройкалул» лагрулий. Школа-лий дуклаки оьрчIру гьарза хьанан биклайхту, вара «халкъуннал стройкалул» лагрулий бубну бур цаймигу корпусу. Бур «Финский къатрал» лагрулий бубсса цамур корпусу. 1960-ку шинал Вихъул-лал школалийсса дуклаки оьрчIал сияхI лархьун дур 700-нийн. Тай шиннардий бивкIун бур шяраву интернатгу.

АцIунния лирчусса шиннар-дил хьхьичI буллай байбивхьуну бур Хикуматрал харжирацIух 220 дуклаки оьрчIансса, кIира зивулийсса школа. Амма, личи-личисса багъантту хьхьичIун багълай, дахьра ца зиву школа-лулгу, спортзалданул чIирттугу бубну, давуртту дацIан дурну дур. ДукIу, интIухунай Дагъуст-таннал Хикуматрал председа-тель Абдулмуслим Абдулмусли-мов Гъумукун увкIсса чIумисса, ванащал хьунаавкъуссия Вихъул-лал школалул директор Аьлил Махаммадов, бубссия школа бацIан бавриясса ихтилат. Вания махь арцугу итадаркъуну, майрай байбивхьуна цусса школа буллай. Дуруна кIира зивулийсса шко-лалул къатри, бубуна спортзал. Дирхьуна классиртIаву партарду ва шаллу дурна цаймигу аьркин-лугь. Стройкалулми давуртту ду-зал дуршиврийн бубну, лента къа-къувкъунува, школа тивтIуна. Ва тивтIавугу дурна дистанцион ман-зилданий Дагъусттаннал бакIчи Сергей Меликовлул.

Ца классравун бавтIуна дук-кавриву хьхьичIун ливчусса клас-су, ванил каялувчи Мадина Ами-раьлиевагу. Школа тивтIатIисса шадлугьрай гьуртту хьуна Ккул-лал райодалул бакIчи Ажуб Хиусманов, администрациялул пи-шакартал Сулайман Хиусманов, Рашид Сулайманов, Абусупиян Абдуллаев, райодалул Депу-татътурал Мажлисрал председа-тель Гъази Оьмаров, Клулшиву дулаврил управлениялул каялув-чи Жамалуттин Оьмариев.

Шяравусса цусса школалия цивппа рязину бушиву бубсуна школалий хьхьичIунну дуклакис-са Хажимурал Хажиевлул. Рай-ондалийсса тагъардания ихтилат бубна Ажуб Хиусмановлул.

Муния махь цинявIпагу лавгу-на «ххойлчинмур» дарсирайн.

Хажимурал ХИУСАЙНОВ,
ш. Вихъул



Подписка 2026

Ххирасса «Илчилул» буккулт!

ЧИЧАРА ККАЗИТ

Баян буллай буру най душиву УФС-райхсса
2026 шинайнсса «Илчилул» подписка!

Лакку кказит зуша бучIан бан
хьанахьиссар укунсса ххуллу-ххуттайх:

Федерал почталийх:

● шинайсса - 1103 къ. ● зуруйсса - 92 къ.

Дагпечатьрайх:

● шинайсса - 504 къ. ● зуруйсса - 42 къ.

«Почта России» сайтрайхчин:

<https://podpiska.pochta.ru/press/P7046>

● шинайсса - 1103 къ. ● зуруйсса - 92 къ.

Редакциялийхчин Дагъусттаннал дазул къатIув:

● шинайсса - 2800 къ. ● зуруйсса - 234 къ.

Халал бунни барчаллагъру

Вай гъантрай Москвавил Аьрасатнал Федерациядул советрал сенатортурал – Илияс Умахановлул ва Аьрасатнал Виричу Виктор Бондаревлул «За помощь и милосердие» тИсса медальду дуллуни хАкъинусса къини хасъсса аьралий операциялий хъхъичИ ххуттай талатисса аьралийтуран ка-кумаг буллалисса хАкъсса патриотътуран ва волонтертуран.



Бюхттулсса наградалун лайкъ хъуминнавах бия Дагъусттаннал бакИчинал кумагчи МахИаммад ХИажимахИаммадов ва хасъсса аьралий операциялий Ватандалул мурадду буручлай къучагъшиврий жан дуллусса Вагъаб Багъауттиновлул кулпат Майсарат.

ДакИнин бутанну, МахИаммад Оьмаров ва Майсарат Багъауттинова чIявучин кIулушиву чIяччяни хасъсса аьралий операциялийсса аьралитурал кумаг буллалаврийну.

МахИаммад Оьмаров цалчинсса гъантрая айивхъуну, гуманитар кумаг цацIун буллай ва ми хъхъичИ ххуттай талатисса аьралийтурачIан биян буллай ур. Ванан щинниярду ххуйну кIулли

ссах мюхтажну буссарив ва ци тIалавшиннарду дуссарив жула аьралийтуран.

Наградалун лайкъ хъусса жула лаккудуш Майсарат Багъауттинова хАкъсса патриот бур. ЧIалай дур ванил дуллалисса давуртту аьралийтураха аякъалийсса ва дакИнийхтунусса душиву. Ванил цила дакI рахIат дуккан даву мурадрай, ласнал аьпалун хас буну, аьралийтуран янна дурухлахисса «Зов героев» тИсса цех тIивтIуну бур. Ва цехраву Майсарат бур аьралийтуран гъилисса гъухъри, ссурсу ларкъусса, дахъра ца лажин чIалачИсса, куклусса къяпри ва утубишай чуваллу бурухлай. Майсарат цуппагу цIанихсса модельер-конструктор бур.



Хасъсса аьралий операция байбивхъуния шийнмай ласнал цинма пиш-каш бувсса янна дуруххай машиналий аьралийтуран янна дурухлай бур. ЦIана ванил цех гьарта-гьарза хъуну бур.

Цуппа ттучаннайх лавгун, чурххан тIааьнсса, кIукIлусса яннарду дурчIуну, буруххай ванил аьралийтуран гъухъри ва термобелье. Гъухъри буруххансса янна машин ласун ванин кумаг буллай бур хасъсса аьралий операциялий аьпалул хъусса аьралийтуран ниттихъул ва кулпатру. Акциярттан хъунмур харж буккан буллай, мудан чIарав ацIлай ур ванил ласнал уссу Халимбаг Багъауттинову.

Майсаратлун кумаг буллай бур ванил душ Мисайгу. Дарсирда бучIайхту тIайланма лагай цехравун.

Ниттил ва душнил дурурххусса яннардайн лачIун дурну дур «Зов героев» тИсса бренд.

ЧIавасса оьрмулий хасъсса аьралий операциялул гурттучитурал чIаишну кумаг баврихлу ва жяматийсса иширттавах гуртту шаврихлу Мисай лайкъ хъуну бур Сергей Меликовлул чулухасса Барчаллагърал чIагарданун.

МахИачкъала шагърулул 49-мур школалий 5-мур классрал дуклаки оьрчIахъ дирхъунни чувшиврул дарс. Шикку гуртту хъун оьвкуну бия хасъсса аьралий операциялий къучагъшиврий жан дуллусса Аьрасатнал Виричу МахИаммад Исбакиевлул ниттийн Марина Апсалуттиновнайн.

Чувшивуртту эбратран дихълай



Чувшиврул дарс хас дурну дия Аьрасатнал Виричу МахИаммад Исбакиевлун. Ванил агъаммур мурадду хъанай бия ялун нанисса ник патриот зумуну тарбия даву ва вирттарал чувшивуртту жагъилсса никкиран эбратну дишаву.

Маринал бувсуна МахИаммад ЧIивинийва хъунанал хIурматгу, чIивинах аякъагу дусса, асламусрал увччусса, гьарзатраву гъунар бусса оьрчI ивкIшиву.

– Цалчин аьралий операциялий гуртту хъун лавгсса аьралийтуравух ия ттул арс МахИаммад. Аьралий бигарду лайкъсса даражалий бартбигълай, хАкъинусса къини 18 дагъусттанлул лайкъ хъуну ур Аьрасатнал Виричунал цIанин. Жула жагъилтурал хасъсса аьралий операциялий къучагъну талай, ккаккан буллай бур цивппа Ватандалийн дакI тIайласса арсеру бушиву. Аьралий операциялий гуртту хъанахъиссаксса хIаллай,

тасттикъ буллай бур, къянкъасса низам дусса, амру биттур бан хIадурсса, унгу-унгусса патриотътал бушиву. Укунсса къучагътал буссаксса, жула аьршарайн шилчIав ша къабизантИссар. Щак бакъар ххувшаву жура ласунтIишиврийн. Барчаллагъ хъунмасса къучагътурал гъунарду абад буллалиминнайн, – увкуну ванил.

– МахИаммад Исбакиев жула аьршарайсса паракъатшиву дурччаврил цIаний нигъ-ццах бакъа талай, къучагъшиву ккаккан дурсса, жагъилсса никкиран эбратрансса Виричу ур! Цала чувшиврийну ванал гъавас бунтунни цинявппагу аьралийтуравун, бюхттул бунни Аьрасатнал аьрал, бюхттул бунни Дагъусттан, – увкунни школалул директор Аьбдулкарим Айгуновлул.

Ахирданий дуклаки оьрчIал риршунни дакИний личIансса суратру.

Агъали къамул бунни



Вай гъантрай Дагъусттаннал экономикалул министр ХИажи Султановлул агъали къамул бунни. Ванашал бия ДР-лул Экономикалул министрвалуцIунсса Жяматийсса советрал член, хасъсса аьралий операциялул гурттучинал кулпат Рада Мурадова.

МахИачкъалалив ялапар хъанахъисса ишбажаранчи Асият ХIасанован кIул хъуну ччай бия бизнесран аьркин дансса оборудование машин ласаврин кумагрансса хIукуматрал чулухасса хIаллихшиннарда.

ХИажи Султановлул балжину бувсунни миннуя, кIишI ларгунни «Социально-экономическое развитие горных территорий Республики Дагестан» тИсса, зун-

ттал районну ядаву мурадрайсса паччахIугърал программалул лагрулий ишла дан бюхъайсса каширду.

Шяраваллил хозяйствалуха, чIиримур ва дянивмур бизнесраха зузиминнаша бюхълай бур цала давриву ишла дансса дянивсса лагрулул техникалух 50% субсидиярттал ласун. Мунийну, хъунмасса мюнпат хъанахъиссар зунттал районнайсса шяраваллил хозяйстварду цу дуккан даврин.

ХИажи Султановлул цацIанма бувкIсса агъалинал масъалартах личIулуну вичIигу дирхъуну, бувчIин бунни ми щаллу баврил ялув ацIаву цала бакIрайн ласунтIишиву.

Лажин хIадур дурссар
Имара САИДОВАЛ

Щалагу Аьрасатнаву нанисса «Классная встреча» проектрал лагрулий чувшиврул ва дакИнин бичаврил дарсеру дирхъунни Щуссалакрал райондалийсса ЩуссачIуртташиял 2-мур школалий. Чувшиврул ва къучагъшиврул дарс дирхъунни ДР-лул НКО-лул Координациялул советрал председатель Шамил Хадулаевлул ва Щуссалакрал райондалул бакИчинал хъиривчу, авгъан дяввилул ветеран Арсен Гъазиевлул.

Буттал кIанттул цIанийсса Хъун дяввилий къучагъну талай бивкIсса вирттарая, Украиннал аьршарайсса тагъардания, хасъсса аьралий операциялул агъамшиврия ва жула аьралийтурал чувшиврия бусласисса ихтилартру бунни хъамаллурал.

– ХИакину жува дакИнин бичлай буру билаятрал тархъаншиву ва цашиву дуручлай бивкIми. ЦIанасса никкирангу кIулну бикIан аьркинссар ва эбратну хъун аьркинссар жула вирттал. Жагъилтал – жула бучIантIимурди. Вайннал тарбиялухсса жула къулагъасгу дикIан багълай бур хъуннасса, хаснур

Чувшиврул дарс



ватан ххирану тарбия баврих, – увкунни Шамил Хадулаевлул.

Дуклаки оьрчIалгу бувсунни Ватандалул мюхчаншиву дурччаврил ххуллий хасъсса аьралий операциялий аьралий бурж

бартбигълай чувшиврий жанну дуллусса Щуссалакрал райондалийсса къучагътура.

Ахирданий дуклаки оьрчIал ва хъамаллурал риршунни дакИний личIансса суратру.



Блокадалуву бивкисса Марина

Махачкьалалив Нацгвардиялул хасъсса моторизованный полкрал аьралийтал бивунни Ленинградулал блокадалуву бивкисса Марина Бессаловацан ва барча бунни ва немец-фашистнал блокадалува Ленинград ххассал бувну 82 шин шаврицун.

Марина Владимировна бивсунни хьамаллурахь блокадалурусса шагьрулул агьалинал бакIрацан дуркисса оь кьинирдая.

Марина ниттишал ва хьунна бавашал Васильевский проспектрай ялапар хьанай бивкIун

бур. Ппу дяввилий ивкIуну ур. 1942-ку шинал Марина цаймигу оьрчIашал шагьрулува буккан бувну бур. Хьуннабава аьпалул хьуну дур. Нину тIурча, захIматну кьашай хьуну, шагьрулуву лирчIун дур. Хьунна хIал кьавхьуну, вагу диркIуну дур.

Марина хIаласса оьрчIру тIайла бивккун бур Майкоп шагьрулисса оьрчIал кьатлувун. Цахьи махь ва цанма душ бан ца кулпатрал бувцуну бур. Амма кулпатрал бакIчи аьрайн уцайхту, Марина цIунилгу интернатрайн багьну бур.

Дявви кьуртал хьуну урчIра шинава, Марина зун бивкIун бур Кановка тIисса поселокрайсса Сталиннул цIанийсса колхозраву. 1956-ку шинал ва бивкIун бур МахIачкьалалив. Шикку бувххун бур паччахIлугьрал Профессионально-техническое училищалувун. Дуккаву кьуртал хьуну махь Маринан шиккува бацан пикри хьуну бур. Зий бивкIун бур III-мур Интернационалданул фабрикалий, «Металлист» заводрай.

Росгвардиялул зузалтрал, полкрал командир, полковник Шамил Ахкубековлул цIания буллунни Марина Владимировна Барчаллагьрал чагьар, тIутIал кацI ва дакIний личIансса бахшиш.

– Ленинградулал блокада хьуссар биляатрал тарихраву ца яла кьювумур ва кьучагьмур ишну. Блокадалуву бивкисса шагьрулул агьалинал чувшиву никирая никирайн буслай, абадлий дакIний дикIантIиссар, – увкунни Маринан цIуллушиву ча тIий полкрал командирнал хьиривчу, подполковник Роберт Аюбовлул.

Марина Владимировна барчаллагь увкунни Росгвардиялул зузалтрахь ветеранурахсса кьулагьасрахлу.

Андриана АБДУЛЛАЕВА

Буржру лахъан

Ларгесса шинал Дагьусттаннал Капитал ремонтрал фондрал чялиш дуккан дурна кьатрал заллукьруннайсса буржру батIаврил даву. Шинал хIасиллайн бувну, Фондрал счтрайн дуркIун дур 209 миллион ва 931 азарда кьуруш. Вай харж дантIиссар шагьрулул агьалинал кьатри дакьин дан.

Агьалиная буржру батIин Фондран 26 азаллий 516-нний лирчусса материаллу (амну 620 миллион арцул хIакьиравусса) судрайн дулун багьну бур. Цала хушрай взносру дуллуминнал арцу 11, 7 миллиондалийн дирсса хьуну дур. КIицI лаган, взносру кьадулаврил чулуша шала республикалий хьхьичI ххуттай МахIачкьала бур. Шиккусса кьатрал заллукьруннал бурж 1 миллиард ва 976 азарда кьурушрайн бивсса бур. Шинал дянив ласун бовхьуну бур 138 миллион. Миннува судрайн буллусса иширттал госпшлина 8 миллиондалия лирчусса дур.

2026-ку шинал Капитал ремонтрал фондрал хьиннура гуж дан тIий дур хушрай кьадулаллисса взносру судрайхчин ласаврил даву. Буржру бусса цинявннал хIакьираву судрайн материаллу дулунтIиссар. Ххуйну хьунссия, буржру бусса инсантурал суд-диваннахун кьабутун лахьарча цала буржру. Мунийну судрацIун дархIусса харжлугь, пени ва приставтуран дулаймургу махьун шун дурну, ххисшаласса чIунгу харж кьадурну.



Лифтру саргъунну зузи даврил ялув бацIан

МахIачкьала шагьрулул Депутатътурал Мажлисрай хьунни ЖКХ-лул, Промышленностьрал ва транспортрал комитетрал заседание. Ва хас дурну дия чIявусса квартирарду бусса кьатраву лифтру инсантуран нигыачIаву дакьа, саргъунну зузи дарил масьалалун.

Шикку гьуртту хьунни Мажлистрал председатель Хиби Аьлиев, Капитал ремонтрал фондрал каялувчи Нажмуттин Ханбалаев, вана хьиривчу Заур Бахмудов, коммунал кьуллугьирттал ва цаймигу организациярттал вакилтал.

Заседаниялий ххал бивгьунни лифтру зузаврил тагьарданул ялув бацIаврил ва агьалинаясса аьрзардал хьирив ччяни буккаврил масьалартту. ЛяличIисса кьулагьасрайн ласун увкунни дух хьусса, мугьлат бакьса даххана дан багьлагьисса лифтру дусса кьатри. Хьунабакьаврил лагрулий икьрал дунни гьаз бувсса масьалартту ччяни бартбигьаву мурадрай ведомствартту хIала-гьурттуну зун, МахIачкьала шагьрулул агьали лифтирдаясса нигыачIаврия мюхчан бансса чаран цачIу лякьин.

Андриана АБДУЛЛАЕВА

«Хиджабрал кьинилун» хасну

Вай гьантрай «Аьрасат -ттул тарихри» тIисса паркраву «Хиджабрал кьинилун» хас дурсса «Хьуннабава, нину ва на» мероприятия хьунни. Ванил сиптачитал ва сакиншинначитал бия Дагьусттаннал Муфтиятрал просвещениялул хьаннил отдел, «Мариям» тIисса Хьаннил рувхIанийсса центрданушал ва «Гьидаят» тIисса Исламрал кIулшивуртту дуллаллисса центрданушал уртакьну.



Зал бувцIуну бия миллатирттал лаххиялурусса хьаннил. ОьрчIи-кIурисса бузмардал ва лачакирттал ссурулкурттри ппив бувну бия залданувух. Куннийр кув авурсса аьнтIикIахьал занакьулушиндарал хьирив лечлачисса яру гьанай бия. Нава оьрчIазаманнайсса хьатIуйн багьсса кунмасса иш бия. Унгу-унгунусса байрандалул хIахI бия. Кьиматрайсса лачакру ккаккьялун дирхьуну дия. Хьуннабавахьал буттукьри ппив бувну, ябивхьуну бия. Так тамаша буван бавтIун бакьаяхха, бия хьаннил паргалшиврул ва гьунардал бьст-ччалгу.

Хьюра командалу ичIаллил кушулул ва канил пагьмурдал устаршиву ккаккан дунни хьуннабавахьул, ниттихьул ва душру гьурттуну. Программалуву дия творчествалул конкурсу.

Цалчинмур кIану буллунни Буцихьиял райондалиясса РахатIиял шьраваллий душавран, кIилчинмур – ТIилитIиял шьраваллий душавран ва шамилчинмур – УнцIукIуллал душавран.

Цуксса хIайпнугу, мероприятиялий гьуртту хьанай буну-

гу, лакралми душру конкурсрай гьурттушинна дуллая бакьая.

Сакиншинначитурал кIицI лавгунни конкурсрал гьанумур мурад, Дагьусттаннал кулпатирттал аьдату ядаву ва цIу дуккан даву душиву.

«Жува чIявуну хьхьичIаранитти-буттал тарбия ххуйсса дулайва, хьуниминал хIурмат бия тIун бикIару. ПпукьлунначIа кьиматраймур, культура дикIу, аьдату дикIу, ялун нанисса никирачIагу кьиматрай дикIаншиврул вайннуа буслангу, укунсса мероприятияртту дуллангу аьркинни. Ва ялагу, ва аьдатрайсса ислам лахьхьин даврил ххуллиисса давугу хьаннахьиссар», – увкунни Дарбантлия бувкIисса лаккудуш Шамсият ХIажимусиловал.

Щаллагу дуняялий «Хиджабрал кьини» кIицI лагайссар февраль зурул 1-нний. 2013 шиная шийннай ва байран кIицI лагай Аьрасатнал регионалнугу. Махьсса шиннардий ва байран Дагьусттаннайгу сийлувун дагьавай дур. МахIачкьалалив дакьагу, цаппара районнай ва шьраваллаву тIицI ларгунни.

Патимат РАМАЗАНОВА

КІулшивурттал бияла хъунмассар

Шиккун оьвкуну бия Москвавуллал личи-личисса вузирдав дуклакисса Дагъусттаннаясса студентътурайну.

Зал чІюлу бувну бия Дагъусттаннал сянатру ккаккан дуллаллисса стендирттал. Вечерданул сакиншинначитал хъунни «Вышшая школа экономики» НИУ-лувусса Дагъусттаннал студентътурал землячество.

«Укунсса Дагъусттаннаясса студентътурал ккуранну дуссар Москвавуллал чІявуми университетирттаву. ХъьхичІва, шийх Дагъусттаннаясса студентътал чансса бусса чІумал, «Дагестан» МЦК-лучІа дурату ца ккуран дуссия – «Жагьилтурал ассоциация». Шанарив шийх 5 азарунния ливчусса жула студентътал бур, Москвавилл ялапар хъанахъисса кулпатирттавами къахІсавну. Ассоциациялул лагрулий ми чачІун бан захІматну бия. Пикри хъуна Ассоциациялия Жагьилтурал координационный совет бан (миннавах «Лакія» ММОЛ-гу), хІала-гъуртгуну зун, куннан куннал кумаг буллан, тарбиялул даву дачин дан ва м.ц. амсса масъаларттаха зун. Укунсса хІала-гъурттушиврул лагрулийри хІакъину жул делегациягу ва мероприятиялий гъуртту хъанахъисса», – бусунни Арсен ХІусайновлул. Шиккува кІицІ лаган, мероприятиялул сакиншиннарал комитетрал чялишса членну хъунни Арсен Буйдалаевичлул душнил оьрчІ, Лавайсса даражалул экономикалул школалул 2-мур курсрал студент Къурбан Сунгъуров, вава школалул цалчинмур курсрал студент Анвар Илиясов.

Вечер сакин дурну дия лавайсса даражаллий. ХІадур дурну дия Дагъусттаннал лайк хъусса артист Рашид Багагаев гъурттусса авадансса концертрал программа. Студентътурахъ Дагъусттаннал халкъуннал культуралія, багъу-бизулия бусласисса, кІулшивурттал бияла хъунмасса бушиврий чІурчІав дуллаллисса ва мюнпатсса маслихІатру буллаллисса ихтилатру бунни Арсен ХІусайновлул, Гульшан Хасаевал, Ххаджжат Цаххаевал.

– Зу дуклай буру билаятрал ца яла сий думур вузраву. Му

Москвавилл Лавайсса даражалул экономикалул школалий (ВШЭ) хъунни Дагъусттаннал культуралул вечер. Мероприятиялий гъуртту хъун, студентътурашал хъунабакъин бувкІун бия «Дагестан» МЦК-лул президент Арсен ХІусайнов, центрданул вакилтал Ххаджжат Цаххаева ва ПатІимат Садыкова, М.Илиясовал цанийсса «Дараччи» ихІсандалул фондрал президент Гульшан Хасаева ва фондрал вакил Шовлукъ Илиясова хІаласса делегация.



хъунмасса тІайлабацІугур, жаваблувшивугур. Шикку ларъсса кІулшивурттугу, тарбиягу зун дучІи льякъинтІиссар гихунмайсса оьрмулуву.

Москвавуллал Авиациялул институтрал преподаватель,

профессор хІисаврай 60-нния лярчусса шиннардий зий, на гъарица къини хъунаакълай ура студентътурашал, аспирантътурашал, магистртурашал. Учин ччива, вузраву ларъсса кІулшивуртту гихуннай зул



лавсун нанисса инсантал хъуну, – увкунни Гульшан Хасаевал.

– Ххирасса студентътал, зу хъанай буру жула хъунмасса билаятрал, Аьрасатнал, граждандтал. Аьрасатнал ца агъамсса бутІанугу хъанай бур караматсса Дагъусттан. Шикку гъарица чарил, кІичІиравалли, жегъир ххуллул цила тарих буссар. ЧІяву миллатру бусса Дагъусттаннай гъарица миллатрал цила маз, аьдат-эбадатру дуссар. Жура ми бусраврай ягу дурну, никирая никирайн дачин дан аьркинссар. Жула бучІантІимур ххуй чулинмай баххана банссар Тіисса вихшала дуссар зуйн, хІакъинусса жагъиллисса никирайн, – увкунни Ххаджжат Цаххаевал.

Студентътуралгу дакІ-нийхтунусса барчаллагъ увкунни цащала хъунабакъин бувкІминнахъ.

Анриана АБДУЛЛАЕВА

Дагъусттаннал паччахІ-дугърал филармониялуву хъунни хъунасса композитор, СССР-данул халкъуннал артист Мурад Къажлаев дуняллийн увккун 95 шинал юбилейран хас дурсса концерт. Къажлаевлул творчество ххираминнан унгу-унгусса байранну хъунни буттал кІанттул магъирлугърал тарихраву хъунасса композиторнал бивхъусса захІмат ккаккан буллаллисса концерт.

«ETHNO BAND» тІисса вокал-инструментал ансамблданул тамашачитурал пишкаш дурунни композиторнал произведенийарттая сакин хъусса авадансса программа. Тамашачитурал бавунни цимил вичІи диширчагу мякъ къалиххайсса «Оьргъиридуш», «Махмурданул сезон» кинофильмравасса балайрду ва бусалардавун багъ-

Хъунасса композиторнал ххазиналувасса балайрду



сса «Далалай».

Къажлаевлул творчестволуву цачІун хъуну дур Баргъбуккавал билаятирттал миллатирттал аьдатру ва европанал классикалул музыкалул пикрирду, оркестр кІулшиву.

«Щунилгу зунттаву» тІисса пьеса хъуну бур композиторнал дакІнива дурксса буттал кІанттунсса гимну.

«Гъай-гъай, ва бур гениалнайсса композиторнал музыка. Зу тІурча, мунни дурну дур ттизаманул журалийсса ххаллисса аранжировка.

Багъа бишун къашайсса захІматри тІиссара вай композициярттаву гъунар бусса инсантураща цусса тарг ва ссихІ би-

шин буюхъаву», – увкунни ДР-лул культуралул министр Зарема Буттаевал концертрая махъ артистътурахъ барчаллагъ тІий.

Концертрай гъуртту хъунни Мурад Къажлаевлул цанийсса Республикалул магъирлугърал школалуцІунсса балайлул ансамбль «Гуниб», балайчитал Вайсул Жалилов ва Диана Тямадаева. Дирижёрнал пульт кІунттил бувгъуну ия ансамблданул каялувчи, щалагу Аьрасатнал ва дуняллул халкъуннал дянивсса конкурсирттал лауреат Рашид Бекеров ва Москвавилл увкІсса Аьрасатнал магъирлугърал лайк хъусса ишккакку Алексей Губарев.

Зулайхат ТАХАКЪАЕВА

Аьпалул махъ

Уссу кунасса дуснал Баширдул аьпалун

Ва зурул 6-нний, ца шинал хъхьичи, лавмартесса бивкIуллул жула дянивату лавсуна, ттул хъинсса маьчачугу, ца ттула чIивима уссу кунасса дусгу, СантIуев Башир.

ОьрчIинияцава жу буттахъал (вай ссурахъал бия) тарбия буннав хъинну куннах кув ччаву дуну. Шяраву давуртту чан къашайвахха, жул кулпатру мудар дуллалимуниву чачIу, чIарав бикIайва. Башир кулпатраву личинура карчи дакъасса, яхI бусса, ссаячIав нигъ дакъасса ия.

Цалчинмур ШувкIуллул школалул комсомол организациялул хъунаманугу увчIуна. Школа къуртал бунну махъ Киев шагърулий, ларайсса кIулшивугу ларсун, зий уссия. Дагъустаннайн зана хъуну махъ жул уссушивул ара хъиннура цIакъ хъуна. Гъинттул чIумал цIанчаннаву хъхьирийн буккайссия, муния махъ паркираву мадарасса заназин дайссия. КIинттул чIумал ччя-ччяни дуссух, мандолинагу сукку бунну, оьрчIругу къавтIути бунну, бигъалагайссия. Жу цанная цаннал цичIав къюлтI къабайссия. Навалу хъатIуй, бивкIулий ккакарчан, Башир акъархха чайва, мунахъгу мукуна цуххайсса бия.

Башир къуртал шавугу ттула чIарав, зяисса бивкIулий щябикIсса кIанай хъуна. Ми гъантрай кказитрайн



ца-кIива махъ чичинсса гъира бакъая. Башир ттуна утти тачIав къаккаккантишиву дакIнил къамул буллай бакъая. Чун лагайтху, дакI паракъат шайссар чай, амма шинал мутталий жагъилсса оьрмулий цал ххаллилсса куяв МахIаммада, кулпатраву яла чIивима, яла ххирама уссу МахIаммад, вайннала хъирив Баширгу аьпалухъхъун лагаву жул агълу-авладран бухIан захIмат хъунни.

Алжан нясив баннав шамунанвагу, хъинну куннах кув ххирассия цивпагу ца оьрмулугу бухъукун.

Шинал хъхьичIивасса шеьригу, Башир къуртал хъуну махъсса гъантрай чивчусса, чан-къансса дахханашиврушал буллай ура.

Инарив лавгунна
вина бигъану,
МахIрумну къабивтун
ххаллилсса арсру.
Зирзунни ххирасса
кулпатрал хъару,
Ччувччунни жяматрал
алвагъсса къаму.

Къадиртун эбратран
карчи дакъашиву,
Ва буттал улкхусса
къанкъасса ччаву,
Къадрулий жяматрал
чIарав ацIаву,
Мюхтажнал ка дугъан
махъал къашаву.
Ххирасса ттула дус
чIарав акъаний,

Уссаксса давраннай
яхъуссар чинна,
Буттахъал ирсирай
тарбия бувсса
Ххаллилсса шама арс
къаивтссар чинна.

Янил ляпI учиннин
шингу ларгунни,
Вих луглай арснал душ
«чаннацIа» хъунни.
Арснал арс Баширдул
ниттихъ пиш кунни,
ДакIнийсса шавумур
ттул хъин къархъунни.

Алжаннул ардарав
тти ухъунссара,
Чийн був хъинбаларттал
хъаттирдай лехлай.
Жул дакIурдивугу сагъну ус-
сара,
МакIурдивух укIлай,
жухъ банмур буслай.
Супиян ОьМАРОВ

Хъуннасса къурчIишивугу кIидачIлай, дакIнийхтунусса жижара буллай буру жушала архIал зузисса Аьлиева Аминатлухъ, Аьлиев Къапланнухъ, вайннал оьрчIахъ, чIарусса шиннардий учительшиву, директоршиву дуллай ивкIсса, жуна цинявннан бусравсса ва хIурмат ххисса инсан **ХIажиакбар** аьпалухъхъун лагаврийн бунну.

Цал бунагирттал аьпа баннав, алжаннул ххари аннав, махънал оьрмурдай барачат бишиннав.

Ккуллал 2-мур школалул коллективрал цIания школалул директор Къурбан ГЪУЛУЛОВ

Баян

«Илчилий» бишлашисса жижараттал текстру буссар
«Илчинин» бишлашисса жижараттал текстру буссар
укунмасса жижара – 300 къ.
суратрашалсса некролог – 1000 къ.

Ванал къабивтссар чаннасса аьпа



Ттигъанну аьпалул хъунни жулла республикалий фармацевтика, аптекарттал сеть хъхьичIуннай давриву хъунмасса захIмат бивхъусса пишакар, СССР-данул цIуллу-сагъшиву дуруччаврил отличник, ДАССР-данул цIуллу-сагъшиву дуруччаврил лайкъ хъусса зузала, лавайсса даражалул провизор, Шахъуйннал шяравасса Къандаев Чавтара Аьбдуллагълул арс. Къурандалий бур «инсантураву яла ххуйма – му инсантуран хайр-мюнпат биян буллалимари» тIисса махъру. Чавтарагу, аьпа биву, ия мукунсса, цайминнан цашава шайсса ка-кумаг буллалисса. Аьркинсса, нажагъ бакъа къабирийясса даруртту лякъ-

ингу, цIуллу-сагъшиврийн багъайсса цайми-цайми масъалартту шаллу бангу ванал мудару ка-кумаг бувайссия гъанмаччаминнангу, шяраваллил инсантурангу, кIулминнангу, хаснува хъхьичIива, дарурттал чулухагу, гъарца чулухагу ссуссукусса шиннардий. ХIакъину республикалийгу, республикалул хъун-шагърулийгу сийлийсса аптекардал сетьру сакин дуллалисса ппурттуву чIарав Чавтара Аьбдуллаевич ивкIссар, учитель ва насихIатчи хIисаврай, цашава шайсса какумаг буллай. Шяравун увкIсса чIумаллив, ЧавтарачIан инсантал бачайссия цалла-цалла къашайшивурттая бусан, маслихIат ккаккан, ванахъ дарув-дарман бува учин.

Увну ур Чавтара 1939-ку шинал Харьковрай Шахъуйннал шяравасса Аьбдуллагълул ва БатIил кулпатраву. Буттал кIанттул цIанийсса Хъунмасса дяьви байбишайхту, ватан дуруччин лавгун бур Чавтарал ппугу, шама буттауссугу: Аьбдуллагълул, ванал уссу Аьбдурашидгу зана къавхъуну бур. Мукун, Чавтарагу хъуна хъуну ур дяьвилул чIявусса ятинтуравасса цану.

Буттал шяраву мукъва, КIундив арулва, ГъунчIукъатIув ацIива классгу бивкуну, Чавтара 1959-ку шинал увххун ур Каспийскаллал медициналул училищалувун. КIилчинмур курсирая айивхъуну Каспийскаллал

шагърулул азарханалий фельдшерну зун ивкIун ур.

Медучилищагу бивккуну, Чавтара сайки шалва оьрмулий зий ивкIссар цалла дакIнил лавъсса пишалий. Дайдихъури дурну дур УнцIуллул участокрал азарханалий фельдшерну зузаврия. Шикку ХарачIи тIисса шяраву ванал тIивтIуну бур ФАП-гу, аптечный пунктгу. Армиялийн гъаннин зий ивкIун ур УнцIуллул амбулаториялул хъунаману. Къуллугъу бунну, зана хъуну махъ зий ивкIун ур ЦIуссалаккуй, бакIрайва – Шушияв ФАП-рай, махъ – ЦIуссалакрал райсанэпидстанциялул хъунама хIакиннал кумагчину. 1966-ку шинал увххун, Чавтарал къуртал бунну бур Харьковуллал фармацевтикалул институт. Шиву дуклай унува, хъхъувай, дежурствартту ласлай, зий ивкIун ур Харьковуллал областьрал клиникалул азарханалийгу, шагърулул Анаварсса кумаграл станциялийгу.

Дуккавугу къуртал хъуну, провизорнал квалификациягу ларсун, Чавтара зана хъуну ур Дагъустаннайн, тийха ацIу тIий, зун Ворошиловградрайн (Луганск) гъан уллай бивкIнугу.

Тарихийсса ватандалийн зана хъуну махъ медициналувусса агъаммур даврицIун Пединститутраву фармакологиялул ва латIин мазрал дарсру

дихълайгу ивкIун ур.

Чавтара зузисса кIанттурду чIявуну баххана шайсса бивкIссар. Цалла даву ххуйну кIулсса лавайсса даражалул пишакар ца кIаная цамур кIанайн гъан увайсса ивкIссар, махъун дагълагъисса участок хъхьичIуннай дуван аьркинсса чIумал. Ванал каялувшиндаралу зузисса идара хъхьичIунминнувах шайсса бивкIссар. Ва ялагу, республикалул биял хъанай къабивкIссар фармацевтътал. Мукун, Чавтара аптекарттай ва Анаварсса кумаграл станциялий зий ивкIссар республикалул личIи-личIисса кIанттурдай: Щурагъ, Лавашав, Южносухокумскалий, МахIачкъалалив ва м.ц. Чув зий унугу, зузиминнал ва къашайшалтрал дянив ванал хIурмат лавайсса бивкIссар. Чавтара Аьбдуллаевичлул каялувшиндаралу Дагъустаннай тIивтIуссар 8 аптека ва 2 оптика.

1984-ку шинал Чавтара ивтссар Республикалул Аптечный управлениялул Центральный аптечный складрал хъунаману.

Махъ ва зун ивкIссар ДАССР-данул ЦIуллу-сагъшиву дуруччаврил министрствалул базалул хъунаманал хъиривчуну. Цимирагу шинай ивкIссар Дагъустан Республикалул ЦIуллу-сагъшиву дуруччаврил министрствалул колегиялул членнугу.

Цанма кIулмуний, цалла дурмуний гъашиву къадувайсса Чавтарал Киеврай медициналул институтраву ва Пяти-

горскалий фармакадемиялувуву бивккуссар пишакаршиву ларай даврил курсу, лавъссар лавайсса категориялул провизорнал свидетельство.

ХIалал дурссар чIярусса наградартту ва цIарду: вайннувах СССР-данул цIуллу-сагъшиву дуруччаврил отличник (1984 ш.), Дагъустан Республикалул цIуллу-сагъшиву дуруччаврил лайкъ хъусса зузала (1999 ш.), захIматрал ветеран (2000 ш.). 1999-ку шинал ванан буллуссар Дагъустан Республикалул ХIукуматрал чулухасса Барчаллагърал чагъар, му шинал республикалий хъанай бивкIсса аьралий иширттаву бувсса кумаграхлу.

Медициналия тархъансса чIун Чавтарал гъан дувайссия аьршараха зий, за дугълай, дургъумуниха къуллугъ буллай, хаснува Лаккуй, буттал шяраву. Ххирассия шяраваллил жямат. Гъарца бивкIубуккулий, жяматийсса иширттаву хъхьичIунминнаву хикIайссия.

Цува кIулну ивкIминнацIа Чавтара Аьбдуллаевичлул къабивтссар цаявасса чаннасса аьпа.

Чавтара аьпалул шаврил жижарагу буллай ванал ичIувацириннахъ, гъанмаччанахъ, ванал рухI хъинний дишиннав учинсса акъа лякъиншиву къакIуллу. Буттун тIий ванал инсантуран мюнпатрансса оьрму.

Бадрижамал АьЛИЕВА

Лакрал халкъуннал учаларттава

Хъунил заллу марщай авиума акъарча, хъурсул хъирив заназимари.

Хъхъунил сайрду буву, дяхтта шанашала, танмакулух рахлу бахху.

Хъхъунил даву – кьинилул тамаша.

ХIав къалавгун тIама дан къаишайссар.

ХIарачатран – хамил чатIул гурга.

ХIарачат къабарчан, барачатеу бакъассар.

Ца ка дакъасса ласнал ниттин – кIирагу дакъасса арнал цар.

Цала талихIрал усттар цумацагу цувари.

Цила чIумал дургъусса хъуничIан хъу къаду-чIайссар.

Цувалу зузинал даву дуз-райн къадуккайссар.

ЦIаравун ххяхху чирчан – цIаравун, щинавун ххяхху чирчан – щинавун.

Чагъарданулчелмуллуца мурчайн къарцину леххан къаишайссар.

Чил канивун ялугълансса къабукканнав.

Чувнал кунна мухIлугу дахIи, царссанил кунна ла-чакеу дуги.

Чавану уна захIмат бул-лан къалахъхирчан, угъара хъувкун, къарид уккайссар.

Чаххуврайн тамахIма гъанттайнсса дакъа личIайссар.

Чун гъан дуван щивцу буку ур.



«Илчи» – маслихIатчи Зумадугъул зуруцIунсса цаппара маслихIатру



Гъарцагу бусурманчунан ххирасса, хъуннасса агъамшиву дусса, мубараксса Рамазан барз байбишин личIай бур ацIнияхъайсса гъантри. Жулва буржгу ва зуруйн багъайкун хIадур шавур, Аллагнашласса жулла дахIаву, арарду цIакъ давриву шайссаксса хъуннасса даву дан хъирив лаяншиврул, ва зуруй жунна дуллусса рувхIанийсса хIикматшивурттая шайссаксса хъуннасса мюнап ласуншиврул.

КIулсса куццуй, ислам-раву гъарцагу дувансса ва дуллалисса даврицIунсса ца агъаммур бутIану ният хъанахъиссар. Ният дува-ра Рамазан барз диндалул аьдат-эбадатирттал чулуха-гу, рахIму-цIимилул, мюхтаж-миннансса ка-кумаграл чулу-хагу шайссаксса барачатну гъан буван.

Инсан та-ухъурчангу хIарачат буллан аьркинссар бунагъмуния архну икIан, кIулну-къакIулну цалва був-са бунагъирттая пашман хъан-ан, Аллагънахъ ялтту учIу, хIалал ити тIун, укунсса зу-рул хъхъичIрив – хъинну-ва, марцIсса, паракъатсса дакIнишал ва чаннасса пик-рирдашал айишиншиврул бусурманчуннай буржлувсса аьдат-эбадатру шаллу дул-лай.

Дувара Рамазан барз бай-бишиннин дуван аьркинсса

давурттал сияхI.

БакIравунияр, чагъарда-ний, яруннил хъхъичI, сияхI дусса чIумал бигъассар даву дуллай айишин, дурмунил ялтту аьш дуккан, дакIнин дагъмур сияхIрайн ххи ду-ван.

Къянкъасса низамирайн дуцара чак буллалаву, цила чIумуй къабуллалаву ягу лягъан битлатаву къадиртун.

Къуран буккин кIулхъурча, цIанава байбихъуну хъинс-сар гъарца кьини ца бунугу аят, хIадис ккалай, Аллагънал цIарду дакIний ритлай. Аьра-брай буккин къакIулминнангу – лахълай байбишин, Рамазан зуруйнини шаллуну къалахъ-хъирчагу, чан-къанссавагу, ца-кIира хIарпрагу кIулну дикIан. КIулсса куццуй, мубараксса зуруй гъарца хIарпирахлуссагу, гъарца бувккумунихлусса бахшиш-гу цуксагу ларай хъанахъ-иссар.

КIулсса куццуй, Рама-зан зуруй бувсса хъинбала-луксса чиригу, итххяхъсса гъалатIрахсса, бунагърахлус-са танмихIгу хъинну хъунма хъанахъиссар. Мунияту, кка-лакки хIадисру, луттирду, ма-къаларду, цавугу бусласисса Рамазан зуруй цукун къуццу тIун аьркинссарив.

ЦIуллу-сагъшиврулсса, бюхъавай, ва барз байбишин-нин бувну хъинссар, хасну-ра ккарччацIун дархIуми да-вуртту.

Зума дургъусса чIумал ду-кра даву чан-къансса дунугу захIмат шай. Мунияту хъинс-сар дукралувун дичинмур (чимус, къур, калан) цIанара мюрш дурну микIлачIун ду-ван. Мукунна микIлачIун ду-ван шайсса дукрарду (ххункI, гъавккури, дурмарду ва ц.), цIанара дурну, морозильни-крал чIамурдай дишин.

Зума дургъусса чIумал къа-бигъану бикIай захIматсса давуртту дуллан, архсса аь-рххирдай буклан. Мунияту, ва кIанттулгу пикри буван аьр-кинссар, мубараксса барз бай-бишиннин хъхъичI-хъхъичIми мурадру бартбигъин.

Агана инсаннай ци-бунугу бурж бухъурча, мугу шал-лу бувну, лавхъун хъинссар, муницIунсса пикрирдахух къа-лаглай, Рамазан зуруй дувай-мур чаннасса бакIрашлал ва куклусса дакIнишал дуллан-шиврул.

Буциннав жува Аллагъ-нал тIайласса ххуллийх, каба-кьиннав дуллалисса гъарцагу даврицIун.

ХIадур бувссар Бадрижамал АБЛИЕВАЛ



Газета «Илчи» (Вестник)
Учредитель: Агентство информации и печати Республики Дагестан
Издатель: ГБУ РД «Этномедиахолдинг «Дагестан»
Хъунама: МахIамаев Аь. М.
Тел.: 65-00-25

Хъунама редактор: Къардашов Р. Аь.
Хъунама редакторнал хъиривма: Башаев Р.М.
Жаваб дулайсса секретарь: Исмяилова С.Р.

Редколлегия:
Адамов АьбдурахIман
МахIаммадович
Аьбдуллаев Сапарбаг Аьлиевич
Аьлиев ХIажи Сулайманович
Исрапилов Артур Анварович
Маммаев Сулайман
Нураттинович
МахIаммадов Юсуп ХIамидович
Хапалаев Аслан Юсупович
Хасаева Гульшан Рамазановна
ХIажимирзаев Зиябуттин
Абусупиянович
Шаллауев Шалласу Рамазанович
Эльдарова Роза ХIажиевна

Отделал редактортал:
Аьбдуллаева А. П.
Аьдилов ХI. А.
Рамазанова П. ХI.
Тахакъаева З. К.

Корреспонденттал:
АьбдурахIманова З. Т.
Аьлиева Б. Д.
Саидова И. А.

Корректор:
АхIмадова А.И.

Къазитрал дизайнертал:
Абакарова К. Н.
ХIажиева З. У.

Къазитрай дурксса макъаларттаву кIицI лавгмур тIайлашиврул жаваб дулайссар чивчуманал.
Редакция макъалалул залуннал пикри-лий рязину бакъахъурчагу, макъала ришайссар, жяматрал цаламур пикри бусанссар тIисса ниятрай. Къазитрайн дуркIсса макъаларттайн рецензия къа-чичайссар ва ми залуннахъхъун зана къадайссар.

Къазит буккайссар ножмардий цал.
Шинай итабакъайссар 48 номер.

Къазитрал индекс. П7046
Тираж – 1652 экз.

Адрес редакции и издателя:
367018, г. Махачкала,
пр-т Насрутдинова, 1а
e-mail: ilchi@etnomediadag.ru
http://ilchi.info
Тел./факс. 66-00-59


Газета «Илчи» зарегистрирована Управлением Федеральной службы по надзору в сфере связи, информационно-технологий и массовых коммуникаций по РД.
Пер. ПИ № ТУ 05-00424 от 30.04.2019

Газета «Илчи» отпечатана в типографии ООО «Издательство «Лотос».
367018, РД г. Махачкала,
Пр-т Насрутдинова, 1а
Срок подписания в печать 19.00.
Подписано 19.00.
Цена 10 руб.



4 651116 280051

МАХIАЧКЪАЛА



Гъавалул тагъар

